

摘藻堂四庫全書薈要

史部

欽定四庫全書薈要

史部

御批通鑑綱目卷五十五

詳校官編修臣汪鏞



欽定四庫全書薈要卷七千三百七十九

史部

御批資治通鑑綱目卷五十五

起庚辰
盡丙戌
考異
提要起庚辰下有晉王存勗稱唐天祐十七年梁主瑱貞明六年盡丙戌下有

後唐莊宗存勗同光四年
明宗嗣源天成元年
凡七年

岐稱唐天祐十七年梁貞明六年○是歲梁晉
岐漢吳凡六國吳越湖南荆南福建凡四鎮
春

三月晉以李建及為代州刺史

晉主自得魏州以李建及為都將建及為人忠壯所得賞賜悉分士卒與同甘苦故能得其死力所向立功同列疾之宦者韋令圖譖之曰建及以私財驟賞施此其志不小王罷建及軍職以為代州刺史

實

魏州注見漢成帝綏和二年
代州注見秦王政三年鴈門

夏四月梁朱友謙取同州遂以河中降晉

梁河中節度使冀王友謙襲取同州以其子令德為
留後表求節鉞不許乃附於晉晉王以墨制除令德

忠武節

質實

河中節度使注見周赧王十二年蒲坂
同州注見唐玄宗開元十一年節鉞注

度使

見唐德宗興元元年忠武節度使注見唐玄宗開
元十一年同州冀州名注見秦二世二年信都

書法

友謙嘗降晉矣書官此其不書官何削之也
曷為削之身為宗臣非有友珪之逼也竊地

以私其子又舉地以歸諸人以此為罪也故削之
而書遂遂決辭也然則曷為不書叛梁之降晉者

例不書叛也何以示懲劉

郢書討則友謙之罪著矣

五月吳宣王隆演卒弟溥立考異

此誤書諡立當作嗣

考證

當去宣字

分註諡
曰宣

王重厚恭恪徐溫父子專政王未嘗有不平之意形於言色溫以是安之及建國稱制尤非所樂多沈飲鮮食遂成疾溫自金陵入朝議當為嗣者或曰蜀先主謂武侯嗣子不才君宜自取溫正色曰吾果有意取之當在誅張顥之初豈至今日邪使楊氏無男有女亦當立之敢妄言者斬乃以王命迎丹陽公溥監國王殂質實金陵昇州注見漢獻帝興平二年蜀先溥即位主謂武侯嗣子不才君宜自取事在漢後主建興元年誅張顥之初事在太祖開平二年丹陽郡名注見漢獻帝興平二年金陵

六月蜀殺其華陽尉張士喬

蜀主作高祖原廟于萬里橋帥后妃百官用褻味作鼓吹祭之士喬上疏諫蜀主怒欲誅之太后不可乃流黎州士喬感憤赴水死蜀主奢縱無度日與太后太妃遊宴貴臣之家及遊近郡名山所費不可勝紀教坊使嚴旭彊取士民女子納宮中累遷刺史太后太妃各出教令賣官每一官闕數人納賂多者得之文思殿大學士韓昭以便佞得幸乞數州刺史賣之以營居第許之識者知蜀之將亡

集覽

原廟

注見漢惠帝四年嚴

質實

一統志云華陽本秦成都縣地名唐貞觀中始分置

蜀縣與成都縣分治郭下乾元初改為華陽縣取華陽黑水惟梁州之義宋元俱仍舊國朝因之改屬成都府萬里橋在成都府城中和門外寰宇記昔諸葛亮送費禕聘吳至此曰萬里之行始於此矣又唐史載玄宗狩蜀過此問橋名左右對以萬里玄宗歎曰開元末僧一行謂更二十年國有難朕當遠遊至萬

里之外此是也遂駐蹕成都鼓吹注見晉武帝
太康三年黎州注見漢武帝元鼎六年沉黎

書法

於是士喬直諫蜀主怒欲誅之以太后不可
流之黎州遂赴水死則曷為書殺誅心也綱

目之法苟有誅意於其臣雖自殺一以
殺書之殺及諫臣而王行之亡決矣

發明

蜀殺諫者此亦將
已之證也故書

梁遣劉鄩等討同州晉遣李存審救之

李存審等至河中即日濟河軍於朝邑梁軍亦大集
河中友諒諸子說友諒且歸款於梁以退其師友諒
曰昔晉王親赴吾急秉燭夜戰今方與梁相拒又命
將星行分我資糧豈可負邪晉人分兵攻華州壞其
外城李存審進逼劉鄩等悉眾出戰大敗宵遁追擊
破之殺獲甚眾存審等移檄告諭關右引兵略地至

下邳謁唐帝陵哭之而還

集覽

朝邑注見隋煬帝大業十三年

質

實

河中府名注見周赧王十二年蒲坂華州注見唐

注見唐懿宗咸通四年十六陵

秋八月蜀主北巡冬十一月遣兵侵岐不克而還

蜀主下詔北巡遂發成都被金甲冠珠帽執弓矢而行旌旗兵甲亘百餘里維令段融上言不宜遠離都

邑當委大臣征討不從十一月遣王宗儔將兵伐岐攻隴州岐王自將屯汧陽蜀將陳彥威敗岐兵于箭

筈嶺蜀兵食盡引還蜀主至利州泛江而下龍舟畫舸輝映江渚州縣供辦民始愁怨至閬州州民何康

女色美將嫁蜀主取之賜其夫家帛百匹夫一慟而卒

集覽

汧陽注見漢光武建武六年箭筈嶺

在天水郡即今秦州
箭筈谷也筭苦活反

質實

成都府名注見晉武帝泰
始八年益州維縣名注見

漢成帝鴻嘉三年廣漢州注見漢光武建武六年
汧一統志云箭苦嶺在鳳翔府岐山縣東北六十里

利州注見漢獻帝建安六年葭
萌閬州注見唐僖宗光啓三年

趙王鎔殺其司馬李藹夷其族

趙王鎔治府第園沼極一時之盛多事嬉遊不親政
事權移左右司馬李藹宦者李弘規用事宦者石希
蒙尤以諂諛得幸鎔晚好佛求僊講經受籙廣齋醮
煉僊丹盛飾館宇於西山每往遊之數月方歸從者
萬人軍民苦之是月自西山還宿鵲營莊石希蒙勸
鎔復之他所李弘規曰晉王夾河血戰擲風沫雨親
冒矢石而王專以供軍之資奉不急之費且時方艱
難人心難測王久虛府第遠出遊從萬一有姦人為

變閉關相拒將若之何錄將歸希蒙曰弘規出不避
語以劫脅王欲以長威福耳錄遂無歸志弘規乃教
內牙都將蕪漢衡帥親軍掾甲拔及詣帳前白錄曰
士卒暴露已久願從王歸弘規因進言曰石希蒙勸
王遊從不已請誅之以謝衆錄不聽牙兵遂大譟斬
希蒙錄怒且懼亟歸府使其長子副大使昭祚將兵
圍弘規及李萬之第族誅之及殺蕪
漢衡收其黨與窮治反狀親軍大恐
沐雨注見周世宗顯德五年
萬一注見唐高祖武德九年

書法

於是所殺三人也弘規漢衡則何以不書犯
也欲正其君而動干戈于君側綱目無取焉

故略之王恭書反張顥徐溫書亂弘規漢
衡不書殺而亂臣不得以趙鞅藉口矣

辛晉岐稱唐天祐十八年梁龍德元年吳睿
已王楊溥順義元年○是歲凡六國四鎮

春正月蜀

主還成都廢其后高氏

蜀主之為太子高祖為聘兵部尚書高知言女為妃
無寵及韋妃入宮尤見疎薄至是遣還家知言驚仆
而卒韋妃者徐耕之孫也有殊色蜀主見而悅之太
后因納於後宮蜀主不欲娶於母族託云韋昭度之
孫蜀主常列錦步障擊毬其中往往遠適而外人不
知葬諸香晝夜不絕久而厭之更葬皂莢以亂其氣
結繒為山及宮殿樓觀於其上或為風雨所敗則更
以新者易之或樂飲繒山涉旬不下山前穿渠乘船
夜歸令宮女秉蠟炬千餘居前船却立照之
水面如晝好為微行酒肆娼家無所不到

集覽

步障

注見唐中宗
景龍二年

質實

皂莢草名性辟穢
污詳見藥性賦

晉得傳國寶

蜀主吳王屢以書勸晉王稱帝晉王以示僚佐曰昔王太師亦嘗遺先王書勸以自帝一方先王語余云昔天子幸石門吾發兵誅賊臣當是之時威振天下吾若挾天子據關中自作九錫禪文誰能禁我顧吾家世忠孝立功帝室誓死不為耳他日當務以復唐社稷為心慎勿效此曹所為言猶在耳此議非所敢聞也因泣既而將佐及藩鎮勸進不已乃令有司市玉造法物黃巢之破長安也魏州僧得傳國寶至是以為常玉將鬻之或識之曰傳國寶也乃詣行臺獻之將佐皆奉觴稱賀張承業聞之亟詣魏州諫曰吾王世世忠於唐室救其患難所以老奴三十餘年為王捃拾財賦召補兵馬誓滅逆賊復本朝宗社耳今河北甫定朱氏尚存而王遽即大位殊非從來征伐之意天下其誰不解體乎王何不先滅朱氏復列聖之深讐然後求唐後而立之南取吳西取蜀泝掃宇內合為一家當是之時雖使高祖太宗復生誰敢居

王上者讓之愈久則得之愈堅矣老奴之志無他但以受先王大恩欲為王立萬年之基耳王曰此非余所願索群下意何承業知不可止慟哭曰諸侯血戰本為唐家今王自取之誤老奴矣即歸晉陽邑邑成疾不復起胡氏曰孔子曰欲速則不達見小利則大事不成晉王以外蕃賜姓豈親宗室之比朱氏未滅偏霸大國周匝三垂存勗戰克攻取之才固為群雄所服而輔世長良之德天下未聞也於是焉而遽登尊極則欲速見小利是以其行不達而大事不成也張承業直不欲晉王為此意在復唐社稷立其後裔此曹孟德所難而何望於

集覽

拈拾拈据俱運反字與通亦拾也漢刑法

志蕭何撫摠秦法顏師古註撫摠收拾也邑邑與悵悵通不安貌三垂三方之遠遶

質實

王太師謂

王建天子幸石門石門鎮名事在唐昭宗乾寧二年閏中注見唐玄宗開元十一年京兆九錫注見漢平

帝元始五年社稷註見新莽天鳳元年藩鎮註見唐
肅宗上元二年長安縣名註見漢惠帝五年晉陽縣
名註見周威烈
王二十三年

書法

得璽必書重國寶也承業之所以死始此矣
終綱目書得璽四漢光武建武三年晉愍帝

建興三年穆帝
永和八年是年

二月成德將張文禮弑其節度使趙王鎔而代之

趙王鎔委政於其子昭祚昭祚性驕懷附李弘規者
皆族之弘規部兵五百人欲逃聚泣偶語未知所之
會諸軍有給賜鎔忿親軍之殺石希蒙獨不時與衆
益懼王德明素蓄異志因其懼而激之曰王命我盡
阮爾曹吾念爾曹無罪不恐不然又獲罪於王奈何
衆皆感泣相與飲酒而謀之酒酣其中驍健者曰吾

曹識王太保意今夕富貴決矣即踰城入鎔方焚香
受錄斷其首而出因焚府第德明復姓名曰張文禮
盡滅王氏之族獨置昭祚之妻普寧公主以自託於
梁三月遣使告亂于晉因求節鉞晉王方置酒作樂
聞之投杯悲泣欲討之僚佐以為方與梁爭不可更
立敵宜且安之王不得已四月承制授文禮成德留
後
質實 成德軍名注見漢光武建武九年常山馮諤
注見唐代宗大歷十一年普寧縣名未詳沿

革

書法

文禮何假子也處直之因書假子都此則曷
為不以假子德明書假子而書弒恒也唐亡

上無天子節鎮專地為之屬者皆其臣矣書將以
弒所以正其君臣之分也故前書張顗徐溫此書

文禮其旨深矣唐亡節

度書弒二楊渥王鎔

夏五月梁殺其泰寧節度使劉鄩

初鄩與朱友謙為昏其受詔討友謙也先遣使移書諭以禍福待之月餘友謙不從然後進兵尹皓段凝因譖之梁主密令西

質實

泰寧節度注見漢獻帝興平二年兗州

六月朔日食質實

日食注見新莽天鳳元年

○秋晉以蕪循為節度

副使

晉王既許藩鎮之請求唐舊臣朱友謙遣蕪循詣行臺循至魏州望府即拜謂之拜殿見王呼萬歲舞蹈泣而稱臣翌日又獻大筆三十枚謂之畫日筆王大喜即命循為河東節度副使張承業深惡之

集

覽

求唐舊臣欲以備百官

質實

翌日明日也河東節度注見漢獻帝建安七年

發明

循故唐之鴟梟晉王乃悅其說而用之獨不念其賣國於盜乎直筆書之失自見矣

八月晉以符習為成德留後討張文禮

文禮既作亂內不自安復遣間使求援於契丹又遣使告梁乞發精甲萬人自德棣度河梁主疑未決敬翔曰陛下不乘此釁以復河北則晉人不可復破矣宜徇其請不可失也趙張輩皆曰今彊寇近在河上盡吾兵力以拒之猶懼不支何暇救文禮乎且文禮坐持兩端欲以自固我何利焉梁主乃止文禮忌趙故將多所誅滅符習將趙兵萬人從晉王在德勝文禮請以他將代之習見晉王泣涕請留晉王曰吾與趙王同盟討賊義猶骨肉不意一旦禍生肘腋吾誠痛之汝苟不忘舊君能為之復讐乎吾以兵糧助汝習與部將三十餘人舉身投地慟哭曰大王念故使輔佐之勤許之復寬習等不敢煩霸府之兵願以所

部徑前搏取凶豎以報王氏累世之恩死不恨矣八月王以習為成德留後命閻寶史建瑋將兵助之自邢洺而北文禮先病腹疽晉兵拔趙州文禮驚懼而卒其子處瑾與其黨韓正時悉力拒晉九月晉兵圍鎮州建瑋**集覽**德棣德本漢平原郡宋置德州今屬中流矢卒濟寧路棣本漢樂安郡隋置棣州今屬濟南路德勝嶺名在契丹北界古北口東北其嶺盤道數折俗呼思鄉嶺前年晉於嶺南北夾河築兩城念故使念常思**正誤**德勝今按後唐李存審於德也故使謂王鎔勝南北築兩城而守之元大

一統志德勝寨在開州南三里即澶州也在大名府南一百六十里德勝口乃契丹北界非梁唐交兵之

地質實

契丹北狄種名注見晉安帝義熙二年德棣德注見陳宣帝大建八年安德棣注見宋明

帝泰始三年樂陵一統志云德勝寨名在大名府開州南三里五代時晉自夾河移澶州於此周世宗又

遷夾河與德勝寨南北相直故居人有南澶北澶之目矣邢治邢注見楚義帝元年襄國治注見漢武帝元狩四年廣平趙州注見漢景帝三年趙國鎮州注見漢光武建武九年常山

冬十月梁襲晉德勝北城晉王擊破之

晉王欲自分兵攻鎮州戴思遠聞之悉衆襲德勝北城晉王知之十月命李嗣源伏兵於戚城李存審屯德勝先以騎兵誘之梁兵競進晉王以鐵騎三千奮擊梁兵大敗失亡二萬餘人
戚城在大名府開州城北七里春秋晉趙鞅納衛世子蒯聩于戚即此

質實一統志云

義武節度使王處直為其假子都所囚

初義武節度使王處直未有子得小兒劉雲郎養為子名之曰都及壯便佞多詐處直愛之置新軍使典

之處直有孽子郁無寵奔晉晉王克用以女妻之累
遷至新州團練使餘子皆幼處直以都為副大使欲
以為嗣及晉王存勗討張文禮處直以鎮定唇齒恐
鎮亡而定孤固諫以為方禦梁寇且宜赦文禮晉王
答以文禮弑君義不可赦又潛引梁兵恐於易定亦
不利處直患之乃潛遣人語郁使賂契丹令犯塞以
解鎮州之圍郁素疾都冒繼其宗乃邀處直求為嗣
處直許之軍府皆不欲召契丹都亦慮郁奪其處乃
以新軍數百伏於府第大譟曰將士不欲以城召契
丹請令公歸西第乃並其妻妾幽之盡殺其子孫腹
心以狀白晉王晉王因以都代處直處直憂憤而卒
胡氏曰王都幽囚父母殺其子孫此與張文禮何異
存勗既為討文禮而許都襲位賞刑如此何以扶天
下之為君父者哉三綱既淪政本亡矣雖暫得之不
旋踵而失之非不幸也

書法

為所因何罪處直也曷為罪之於是文禮弑逆處直為之游說請緩晉師既不可則召契

丹欲以撓晉黨逆以誨盜召敵以失衆處直之罪也然則都無罪乎號曰子矣而囚其父罪固不待言矣

發明

王都囚其養父綱目乃歸曲於王處直何哉張文禮有弑主之罪晉王仗義討之處直乃

陰為文禮之地又欲引敵為寇以撓其謀遂召幽囚之辱故綱目書其為假子所囚而不言假子囚其養父也若夫王都囚父之罪固自不言可知晉王不能執而戮之豈不惜哉

吳王溥祀南郊

吳徐溫勸吳王郊祀或曰唐祀南郊其費巨萬今未能辦也溫曰吾聞事天貴誠多費何為唐每郊祀啟

南門灌其樞用脂百斛此乃季世
奢泰之弊又安足法乎乃祀南郊
集覽灌其樞爾雅

璞注門戶

扉樞也

書法

諸國王非卒不名溥何以名罪溥也吳叢爾
國雖上無天子而行郊祀僭已甚矣故斥名

之罪

十一月晉王自將討鎮州

晉王使李存審李嗣源守德勝自將兵攻鎮州旬日
不克張處瑾使韓正時突圍出趨定州求救晉兵追
斬之
質實定州注見周威烈
王二十三年中山

十二月契丹寇幽州拔涿州進寇義武晉王救之考異

寇並當作
侵或作攻

王郁說契丹主曰鎮州美女如雲金帛如山天皇王
速往則皆已物也不然為晉王所有矣契丹主以為
然悉衆而南舒魯后曰吾有西樓羊馬之富其樂不
可勝窮也何必勞師遠出以乘危徼利乎吾聞晉王
用兵天下莫敵脫有危敗悔之何及契丹主不聽十
二月攻幽州李紹宏嬰城自守契丹南圍涿州拔之
擒李嗣弼進寇定州王都告急
于晉晉王將親軍五千救之
西樓契丹於所居大部落之內置樓
謂之西樓在黃龍府西北今上京是
德四年涿州注見
漢帝玄更始二年

書法

義武何王都也幽州書寇可矣都因假父亦
寇契丹何中國雖失道契丹不得而加之也

集覽

天皇王契丹國
中稱其主云然

質實

幽州注見
唐高祖武

壬晉岐稱唐天祐十九年梁龍
午德二年○是歲凡六國四鎮
春正月晉王擊契丹大

敗之

晉王至新城候騎白契丹前鋒涉沙河將士皆失色
有亡去者斬之不能止諸將皆曰吾衆寡不敵又梁
寇內侵宜且還師以救根本或請西入井陘避之晉
王猶豫未決郭崇韜曰契丹本利貨財而來非能救
鎮州之急難也王新破梁兵威振中外挫其前鋒遁
走必矣李嗣昭亦曰彊敵在前有進無退不可輕動
以揺人心晉王曰吾以數萬之衆平定山東今遇此
小醜而避之何面目以臨四海乃自帥鐵騎五千先
進至新城北半出桑林契丹見之驚走晉王分軍逐
之獲契丹主之子契丹舉衆退保望都晉王至定州
王都迎謁馬前請以愛女妻王子繼岌王引兵趣望
都遇奚酋托輝五千騎為其所圍力戰出入數四不

解李嗣昭引三百騎橫擊之虜退王乃得出因縱兵奮擊契丹大敗逐北至易州會大雪彌旬平地數尺契丹人馬死者相屬契丹主乃歸晉王引兵躡之隨其行止見其野宿之所布橐于地回環方正皆如編剪雖去無一枝亂者嘆曰敵用法嚴乃能如是中國所不及也晉王至幽州使二百騎躡契丹之後曰虜出境即還騎恃勇追擊之悉為所擒契丹主責王郁繫之以歸自是不聽其謀胡氏曰晉王聽王都囚父取國既失於前今因其出迎明父子之義討而殺之則軍政脩明人心聳服契丹將不戰而自退矣晉王先助劉守光今又助王都何有見於斬張彥而無見於此邪凡此類皆制勝之大幾也接而不失惟上智能之

集覽

井陘注見秦王政十八年堂都縣名在灤州東北四十里唐末契丹按巴堅攻陷平營民

多亡佚之故有按巴堅即其所居地立縣因其來處地名而名之故有望都安喜等縣奚酋托輝奚東蕃部名

苗君長之稱托輝苗之名繫之以歸繫陟立反詩繫之維之注疏繫之謂絆絆繫足也斬張房事在貞明元年制勝之大幾幾會也易繫質實唐僖宗光啟元辭曰君子見幾而作不俟終日質實唐僖宗光啟元年一統志云沙河在保定府祁州城西南二十一里源自定州流經州境東南與滋河合入易水循豫注見秦孝文王元年山東道名注見宋文帝元嘉二十五年望都縣名注見晉安帝隆安二年逐北注見周赧王三十一年

梁襲晉魏州不克攻德勝北城二月晉王還魏州梁兵遁還

李存審謂李嗣源曰梁人聞我在南兵少不攻德勝必襲魏州不若分軍備之遂分軍屯澶州戴思遠果

悉衆趣魏州嗣源引兵先之遣兵挑戰思遠知有備乃西拔成安大掠而還又攻德勝北城重塹複壘斷其出入晝夜急攻存審悉力拒守晉王聞之自幽州赴之五日至魏州思遠燒營遁還

集覽

澶

注見晉主重質實挑戰注見漢王邦四年一統志云貴開運元年質實成安本春秋晉乾侯地名漢為魏

郡斥丘縣地晉因之後魏置成安縣後周屬相州隋屬魏郡唐屬磁州尋改隸相州又割隸洺州宋金因之元省入潞縣尋復置屬磁州國朝因之改屬廣平府

晉師圍鎮州不克退保趙州夏四月晉李嗣昭戰死

晉間寶築壘以圍鎮州決滹沱水環之內外斷絕城中食盡遣五百餘人出求食寶縱其出欲伏兵取之其人遂攻長圍寶不為備俄數千人繼至遂壞長圍縱火攻營寶不能拒退保趙州晉王以李嗣昭為招

討使代寶張處瑾遣兵千人迎糧於九門。昭設伏邀擊之，殺獲殆盡。鎮兵發矢中其腦。昭拔矢射之一發而殪。是夕亦卒。晉王聞之，不御酒肉者累日。昭遺命，悉以澤潞兵授判官任圜，使督諸軍攻鎮州。號令如一，鎮人不知。昭昭之死也，晉王以李存進為招討使，命嗣昭諸子護喪歸葬。晉陽其子繼能不受命。帥兵擁喪歸潞州。嗣昭七子繼儔當襲爵，素懦弱，繼韜凶狡，囚之，詐令士卒劫已為留。後晉王不得已，改昭義曰安義，**集覽**，潞沱水，注見漢帝玄更始二年，以繼韜為留後。**唐置勸州，後廢屬鎮州。****質實**，九門縣，名，注見唐玄宗天寶十五載，澤潞二州名，澤，注見梁武帝中大通六年，建州潞，注見周赧王五十年，上黨昭義軍名，注同上文。

秋八月梁取晉衛州

晉衛州刺史李存儒本姓楊名婆兒以俳優得幸於晉王為刺史專事培植歛防城卒皆徵月課縱歸梁段

凝張朗引兵夜襲之詰旦登城執存儒遂克衛州戴思遠又與凝攻陷淇門共城新鄉於是澶州之西相

州之南皆為梁有晉人失
集覽
淇門注見唐昭宗大軍儲三之一梁軍復振
順二年共城縣名屬

河內郡共音恭按河內郡今懷州是新鄉縣名屬汲郡按古汲郡今衛州是相州古鄴郡今彰德府是殷

王河亶甲
質實
衛州注見秦王政六年朝歌俳優注居相即此
見漢武帝建元三年詰旦注見梁武

帝大同二年一統志云共城古共伯之國周為鄘國地春秋時併於衛漢始置共縣屬河內郡晉屬汲郡

隋改為共城縣唐初以縣置共州並析置凡城縣尋罷州及省凡城入焉屬衛州金改為河平縣後改為

蘇門縣尋陞為輝州元因之國朝仍降為縣屬衛輝府新鄉本漢河內郡獲嘉汲二縣地晉因之隋於古

新樂城置新鄉縣唐初屬義州後屬衛州宋初省入汲縣元祐初復置金元俱仍舊國朝因之改屬衛輝府

九月晉王克鎮州自領之以符習為天平節度使

張處瑾使其弟處球乘李存進無備將兵七千人奄至東垣渡及營門存進狼狽引十餘人闕於橋上鎮兵退晉騎兵斷其後夾擊之鎮兵殆盡存進亦戰沒晉王以李存審為招討使鎮州食竭力盡處瑾遣使請降未報存審兵至城中將李再豐投縋以納晉兵執處瑾兄弟及其黨高濛送行臺趙人皆請而食之磔張文禮屍於市王鎔故侍者得鎔遺骸晉王祭而葬之以符習為成德節度使習辭曰故使無後而未葬習當斬袁以葬之俟禮畢聽命既葬即詣行臺趙人請晉王兼領成德從之乃割相衛二州置義寧軍

以習為節度使習辭曰魏博霸府不可分也願
得河南一鎮習自取之乃以為天平節度使 集覽

礫竹格切裂也漢制 質實 東垣縣名注見漢高帝八

諸死刑皆礫於市 年狼須注見漢獻帝初平

三年斬衰注見漢靈帝熹平五年魏博軍名注見漢

成帝綏和二年天平節度注見漢獻帝興平元年東

平

書法

書自領何美符習也符習之請討文禮也晉
以成德留後命之於是鎮州既克改命義寧

習無愠色且請自攻河南以取一鎮不背本不矜
功不固求若習者可謂賢矣綱目前書以習為成

德留後此書自領之以
為天平所以美習也

冬十一月唐特進河東監軍使張承業卒

曹太夫人詣其第為之行服如子
姪之禮晉王聞之亦不食者累日

書法

監軍具官卒於楊復光見之矣至是再見其
再見何承業賢也於是唐亡十六載矣曷為
冠之以唐著承業之乃心唐室也是故張良心乎
韓者也故韓雖亡而書韓人陶潛心乎晉者也故
晉雖亡而書晉徵士承業心乎唐者也故唐雖亡
而書唐特進監軍書卒終綱目二人而已矣
楊復光張承業

發明

承業之賢先儒固已論之矣綱目於其卒也
書爵書官既足以著其美然承業在晉已非

一日而綱目必繫之唐者表其始終為唐不失臣
節用見承業固唐之臣也夫以一宦者而能盡節
若此乃有名為縉紳如蔣元暉柳璨張文蔚楊涉
之徒賣國從賊者豈非狗彘之不若哉承業卒六

月而亞子稱帝
良有以也悲夫

十二月晉以張憲權鎮州事

魏州稅多逋負晉王以讓司錄趙季良季良曰殿下
何時當平河南王怒曰汝職在督稅何敢預我軍事
季良對曰殿下方謀攻取而不愛百姓一旦百姓離
心恐河北亦非殿下之有况河南乎王悅謝之自是
重之每質實張憲晉陽人河南道名注見宋主昱元
預謀議徽元年河北道名注見漢成帝綏和二

年魏郡魏州
注同上文

癸岐稱唐天祐二十年梁龍德三年盡十月四月以後
未唐莊宗李存勗同光元年○是歲梁亡晉稱唐凡五

鎮國四
春二月晉以豆盧革盧程為行臺丞相

晉王下教於四鎮判官中選前朝士族欲以為相河東判官盧質為之首質固辭請以義武判官豆盧革河東推官盧程為之即拜行臺左右丞相以質為禮部尚書

集覽

豆盧注見前唐高祖武德四年

質實

河東軍名注見齊明帝建武三年

梁以錢鏐為吳越王

鏐始建國儀衛名稱多如天子之制惟不改元置百官有丞相侍郎客省等使

三月晉李繼韜以潞州叛降梁其將裴約據澤州不下

李繼韜為留後終不自安幕僚魏琢牙將申蒙復從而問之曰晉朝無人終為梁所併耳弟繼遠亦勸之繼韜乃使繼遠詣大梁請降梁主大喜以繼韜為節度使安義舊將裴約戍澤州泣諭其衆曰余事故使

踰二紀見其分財享士志滅仇讐不幸捐館柩猶未
塋而郎君遽背君親吾寧死不能從也遂據州自守
梁遣董璋將兵攻之繼韜散財募士堯山人郭
威徃應募嘗殺人繫獄繼韜惜其才勇而逸之
捐館注見前唐質實大梁郡名注見周顯王二十九
代宗永泰元年年安義軍名注見周赧王五十
三年上黨堯山縣名注
見漢高帝八年柏人

書法

高書不下何特子守節也故書法同堯君素唐

得者矣凡晉臣降
梁則書叛是年

夏四月晉王存勗稱皇帝于魏州國號唐

晉王築壇于魏州牙城之南四月升壇祭告遂即帝
位國號大唐尊母曹氏為皇太后嫡母劉氏為皇太

妃初太妃無子性不妬忌太后亦謙退相得甚懽及受冊太妃詣太后宮賀有喜色太后怵不自安太妃曰願吾兒享國久長吾輩獲沒于質實怵怵慚愧地園陵有主餘何足言因相向歔歔質實也歔歔注見漢光武建武二年

書法

綱目於晉多予辭此其書稱皇帝如梁何惜之也綱目子晉以其不忘唐也主讐之未減

而遽自立綱目惜之書曰國號唐所以殊朱邪於李氏也不書則疑於漢昭烈

發明

晉王父子忠於唐室初志甚善于時讐賊尚在乃遽自稱尊其視朱溫劉守光相去無幾

向使亞子能掃滅朱氏復立唐後則綱目必因其以天祐紀年繼續唐統而不絕之矣惟其利而自取故雖自謂紹唐君子亦豈敢以沙陀之種而比之漢昭烈晉元帝使得紹李氏之正統哉故書存

勗稱帝國號唐待以列國而別異之此固公天下之法也夫豈私於漢晉而薄於後唐哉

唐以豆盧革盧程同平章事郭崇韜張居翰為樞密使

革程皆輕淺無他能唐主特以其衣冠之緒霸府元僚故用之李紹宏自幽州召還崇韜惡其位在已上乃薦居翰而以紹宏為宣徽使紹宏恨之居翰和謹畏事軍國機政皆崇韜掌之孔謙自謂應為租庸使衆議以謙人微地寒故崇韜薦張憲以謙副之謙亦不悅胡氏曰建王霸之績者必有心腹股肱之臣其未濟也以爲謀主其既成也遂登輔相輔相之任當承平之際無遠慮者或不知考慎矣若創業垂統之君天下固以此卜其成敗而可忽諸梁唐晉漢之朝無所彌焉豈氣方紛亂天不生賢邪將人主無知人之鑒而不**集覽**衣冠之緒衣冠士大夫也緒謂基緒能致邪**統系也**猶言後裔考慎注見前唐德

宗貞元三年

質實

幽州注見唐高祖武德四年

唐建東西京及北都

以魏州為興唐府建東京又於太原府建西京又以鎮州為真定府建北都時唐國所有凡十三節度五十

州質實

興唐府注見漢成帝綏和二年魏郡太原府注見漢

光武建武九年常山

閏月唐立宗廟于晉陽

唐主追尊曾祖執宜曰懿祖昭烈皇帝祖國昌曰獻祖文皇帝考晉王曰太祖武皇帝立宗廟于晉陽以高祖太宗懿宗昭宗洎懿祖以下為七室

唐遣李嗣源襲梁鄆州取之以嗣源為節度使

契丹屢寇晉幽州衛州為梁所取潞州內叛人情岌岌以為梁未可取唐主患之會鄆州將盧順密來奔言曰鄆州守兵不滿千人可襲取也郭崇韜等皆以為不可唐主密召李嗣源謀之曰梁人志在澤潞不備東方若得東平則潰其心腹東平果可取乎嗣源自胡柳有度河之慙常欲立奇功以補過對曰今用兵歲久生民疲弊苟非出奇以勝大功何由可成臣願獨當此役必有以報唐主悅遣嗣源將精兵五千趣鄆州日暮陰雨道黑將士皆不欲進高行周曰此天贊我也彼必無備夜渡河至城下鄆人不知李從珂先登殺守卒啟關納外兵進攻牙城拔之嗣源禁焚掠撫吏民唐主大喜曰總管真奇才吾事集矣即以為天平節度使梁主大懼遣使詰質實岌岌不安讓諸將段凝王彥章等趣令進戰

見唐肅宗寶應元年東平郡名注見漢獻帝興平元年胡柳有度河之懸事在太祖開平四年

五月梁遣招討使王彥章攻唐德勝南城拔之進攻楊
劉六月唐主救之梁兵退秋七月彥章罷

敬翔知梁室已危以繩內靴中入見梁主曰先帝取天下不以臣為不肖所謀無不用今敵勢益彊而陛下棄忽臣言臣身無用不如死引繩將自縊梁主止之問所欲言翔曰事急矣非用王彥章為大將不可救也梁主從之以彥章為招討使仍以段凝為副唐主聞之自將親軍屯澶州命朱守殷守德勝戒之曰王鐵槍勇決宜謹備之守殷王幼時所役蒼頭也五月遣使徵兵於吳徐溫欲持兩端遣兵循海助其勝者嚴可求不可乃止梁主召王彥章問以破敵之期彥章對曰三日左右皆失笑彥章出兩日馳至滑州

置酒大會陰遣人具舟於楊村夜命甲士六百皆持
巨斧載冶者具鞬炭乘流而下會飲尚未散彥章陽
起更衣引精兵數千循河南岸超德勝天微雨朱守
殷不為備舟中兵舉鑼燒斷之因以巨斧斬浮橋而
彥章引兵急擊南城破之適三日矣守殷救之不及
彥章進攻諸寨皆拔之聲勢大振唐主遣官者焦彥
賓急趣楊劉與鎮使李周固守命守殷棄北城撤屋
為械載兵械浮河東下助楊劉守備王彥章亦撤南
城屋材浮河而下每遇灣曲輒於中流交關一日百
戰互有勝負比及楊劉殆亡士卒之半彥章以十萬
衆攻楊劉城垂陷者數四李周悉力拒之與士卒同
甘苦彥章不能克退屯城南唐主引兵救之曰李周
在內何憂日行六十里不廢畋獵六月至楊劉梁兵
塹壘不可入唐主問計于郭崇韜對曰請築壘於博
州東岸以固河津既得以應接東平又可以分賊兵
勢但慮彥章薄我城不能就願募死士日挑戰以綴

之旬日不東則城成矣時李嗣源守鄆州河北聲問不通人心漸離不保朝夕會梁將康延孝密請降於嗣源延孝者太原番人有罪奔梁嗣源遣押牙范延光送延孝蠟書延光因言于唐主請築壘馬家口以通鄆州之路唐主遣崇韜將萬人夜發度河築之晝夜不息自與梁人晝夜苦戰崇韜築城六日彥章聞之將兵數萬馳至急攻時板築僅畢未有守備崇韜慰諭士卒以身先之四面拒戰唐主引大軍救之彥章退保鄆家口鄆州奏報始通李嗣源請正朱守殷覆軍之罪不從七月唐主引兵南彥章等復趣楊劉李紹榮直抵梁營擒其斥候又以火械焚其連艦彥章等走退保楊村唐兵追擊之梁兵前後死者且萬人楊劉圍解城中無食已三日矣彥章疾趙張亂政謂所親曰待我成功還當盡誅姦臣以謝天下趙張聞之私相謂曰我輩寧死於沙陀不可為彥章所殺相與協力傾之段凝素疾彥章而諂附趙張百方沮撓

之惟恐其有功每捷奏至趙張悉歸功於凝由是彥章功竟無成梁主猶恐彥章成功難制徵還大梁

集覽

以繩內內讀曰納入也黼炭黼與排通音步拜反即今皮排也所以吹扇火者蠟書注見唐德

宗建中

質實

澶州注見隋恭帝皇泰二年滑州注同上年楊劉城名注見唐憲宗元和十三

年博州注見漢獻帝興平二年東郡斥候注見漢武帝元封元年挑戰注見漢王邦三年沙陀謂李存勖

又注見唐睿宗太極元年

唐盧程罷

程以私事干興唐府府吏不能應鞭吏背少尹任園唐主姊壻也詣程訴之程罵曰公何等蟲豸欲倚婦力邪唐主怒曰朕誤相此癡物欲**集覽**蟲豸音丈賜自盡盧質力救之乃貶右庶子

足者曰豸

蟲音虫

八月梁取唐澤州裴約死之

裴約遣間使告急唐主曰吾兄不幸乃生梟獍裴約獨能知逆順顧謂指揮使李紹斌曰澤州彈丸之地朕無所用卿為我取裴約以來紹斌至城已陷約死唐主深惜之

集覽

梟獍注見晉元帝太興元

年

質實

間使注見漢武帝元狩元年彈丸之地喻土地褊狹也

書法

書死之何子節也終綱目書死之五十五詳孺子嬰居攝元年而五季書十人焉裴約王

彦章姚洪夏魯奇宋令詢沈斌聶廷美趙崇溥劉仁贍張彥卿何代不生才疾風知勁草信矣

發明

前書李繼韜叛降于梁已正繼韜叛國之罪次書其將裴約據澤州不下已予裴約不屈

之節至是書梁取唐澤州裴約死之是予其死節
之實其旨明矣夫繼韜叛君事讐裴約審於大義
守死不屈觀其所以泣諭其衆之語可謂詞旨甚
白故綱目書而予之亦所以為知義守節者之勸
也

梁以段凝為招討使遣王彥章張漢傑攻鄆州

梁主遣段凝監軍河上敬翔李振屢請罷之梁主曰
凝未有過振曰俟其有過則社稷危矣至是凝厚賂
趙張求為招討使翔振力爭不從於是宿將憤怒士
卒亦不服凝將全軍五萬濟河掠澶州至頓丘梁主
又命王彥章將保鑾騎士萬人屯兗鄆
之境謀復鄆州仍以張漢傑監其軍
質實 頓丘縣
晉高祖天福三年兗州名
注見漢獻帝興平二年

梁將康延孝奔唐

唐主引兵屯朝城康延孝來奔唐主解錦袍玉帶賜之以為招討指揮使問以梁事對曰梁朝地不為狹兵不為少然主既暗懦趙張擅權內結宮掖外納貨賂段凝智勇俱無專率欽行伍以奉權貴梁主不能專任將帥常以近臣監之進止可否動為所制近又聞欲數道出兵令董璋趣太原霍彥威寇鎮定王彥章攻鄆州段凝當陛下決以十月大舉臣竊觀梁兵聚則不少分則不多願陛下養勇蓄力以待其分帥精騎五千自鄆州直抵大梁擒其偽質實

朝城縣名

注見晉高祖開運三年太原府名注

見齊明帝建武三年并

書法

延孝何以書志梁所以亡也延孝奔唐而後唐有滅梁之志矣凡外將必闢於成敗之故

而後書是故得李祐而後淮西之破決得
延孝而後朱梁之亡決綱目每謹書之

發明

書奔不書叛義已見於前矣一將之降本無
足道然唐之滅梁梁之見滅決於是矣故書

九月蜀主宴群臣於宣華苑

蜀主以韓昭潘在迎顧在珣等為狎客陪侍遊宴與
宮女雜坐或為豔歌相唱和褻慢無所不至樞密使
宋光嗣等專斷國事恣為威虐務狗蜀主之欲以盜
其權宰相王鉞庾傳素等各保寵祿無敢規正潘在
迎每勸蜀主誅諫者無使謗國嘉州司馬劉贊獻陳
後主三閣圖並作歌以諷賢良方正蒲禹卿對策語
極切直蜀主不能用至是以重陽宴羣臣於宣華苑
酒酣嘉王宗壽乘間極言社稷將危流涕不已昭曰
嘉王好酒悲
質實
嘉州注見唐僖宗中和元年陳後
主三閣圖注見陳後主至德三年

臨春閣重陽節名注見
唐憲宗元和十五年

冬十月朔日食

唐主救鄆州梁師敗績王彥章死之唐主入大梁梁主
瑱自殺唐遂滅梁

唐自德勝失利以來喪芻糧數百萬租庸副使孔謙
暴斂以供軍民多流亡租稅益少澤潞未下契丹屢
寇瀛涿又聞梁人欲大舉數道入寇唐主深以為憂
召諸將會議李紹宏等皆以為鄆州難守請以易衛
州及黎陽於梁與之約和休兵息民更圖後舉唐主
不悅曰如此吾無葬地矣乃獨召郭崇韜問之對曰
陛下不擲沐不解甲十五餘年欲雪國家讐耻今已
正尊號始得鄆州尺寸之地不能守而棄之臣恐將

士解體將來食盡衆散雖畫河為境誰為陛下守之
臣嘗細詢康延孝以河南之事度已料彼日夜思之
成敗之機決在今歲梁今悉以精兵授段凝決河自
固恃此不復為備凝非將材不足畏降者皆言大梁
無兵陛下若留兵守魏固保楊劉自以精兵與鄆州
合勢長驅入汴偽主授首則諸將自降矣不然今秋
不登軍糧將盡大功何由可成諺曰當道築室三年
不成帝王應運必有天命在陛下勿疑耳唐主曰此
正合朕志丈夫得則為王失則為虜吾行決矣司天
奏天道不利不聽王彥章將攻鄆州李嗣源遣從珂
逆戰敗其前鋒彥章退保中都捷奏至唐主喜曰鄆
州告捷足壯吾氣命將士悉遣其家歸興唐亦遣夫
人劉氏皇子繼茂歸與之訣曰事之成敗在此一決
若其不濟當聚吾家於魏宮而焚之胡氏曰莊宗以
宦官之譖罷李建及而失忠壯之助以俳優之悅用
李存儒而失要害之地以役使之愛使朱守殷而陷

南城喪芻糧數百萬幾如是而地不覺國不亡然則
不旋踵而克梁者非晉必當克也蓋梁祚告終之期
促耳且經營大業者必厚其根本之地使進可以取
退可以保今晉雖久有河東其地瘠薄故必兼得河
北然後富彊然晉王不擇牧民御衆之才守之又令
孔謙之徒急政暴賦趣辦目前至於崇輶決策擣汴
亦未及善後之計也而莊宗所謂丈夫得則為王失
則為虜遣妻子歸而與之訣者亦不敢必於克梁也
嗚呼捐身與家以爭天下將以濟民乎抑亦濟欲乎
此非真英雄之所為不足道也○濟河至鄆州中夜
進軍以李嗣源為前鋒遇梁兵一戰敗之進至中都
圍之梁兵潰追擊破之彥章走將軍李紹奇追之彥
章重傷馬躡遂擒之並擒張漢傑等二百餘人斬首
數千級彥章嘗謂人曰李亞子聞鷄小兒何足畏至
是唐主謂曰爾嘗謂我小兒今日服未且爾名善將
何不守兗州中都無壁壘何以自固彥章對曰天命

已去無足言者唐主惜彥章之材欲用之賜藥傳其
創屢遣人誘諭之彥章曰余本匹夫蒙梁恩位至上
將與皇帝交戰十五年今兵敗力窮死自其分縱皇
帝憐而生我我何面目見天下之人乎豈有朝為梁
將暮為唐臣此我所不為也唐主復遣嗣源自往諭
之彥章臥謂曰汝非邈佶烈乎於是諸將稱賀唐主
舉酒屬嗣源曰今日之功公與崇韜之功也鄉從紹
宏革語大事去矣謂諸將曰鄉所患惟彥章今已就
擒是天意滅梁也段凝猶在河上何向而可諸將以
為東方諸鎮兵皆在段凝麾下所餘空城耳以天威
臨之無不下者若先廣地東傳于海然後觀釁而動
可以萬全康延孝固請亟取大梁嗣源曰兵貴神速
今彥章就擒段凝必未之知就使有人走告之疑信
之間尚須三日設若知吾所向即發救兵直路則阻
決河須自白馬南渡舟楫亦難猝辦此去大梁至近
無險方陳兼程信宿可至段凝未離河上友貞已為

吾擒矣延孝之言是也請陛下以大軍徐進臣願以千騎前驅唐主從之令下諸軍踊躍嗣源是夕遂行明日唐主發中都以王彥章終不為用斬之胡氏曰梁之所以所以亡以理言之朱氏無長久之道以事言之友貞踈遠勲舊信任姻黨將士解體卒伍離心敬翔皆無以正之獨請用王彥章自古頗聞倚一猛將能救危而扶顛者邪夫彥章固善鬪然所當者乃朱守殷夫人能破之矣及李周固守則彥章以十萬衆而不能克其才亦可見矣其所以著名者特以死節不屈爾此則五代之臣所難及者也○越二日至曹州梁守將降梁主聞彥章就擒唐軍且至聚族而哭召羣臣問策皆莫能對謂敬翔曰朕忽卿言以至於此今事急矣將若之何翔泣曰臣受先帝厚恩殆將三紀名為宰相其實朱氏老奴事陛下如郎君前後獻言莫匪盡忠陛下不用致有今日雖使良平更生誰能為陛下計者臣願先賜死不忍見宗廟之亡也因

與梁主相向痛哭時城中尚有控鶴軍數千朱珪請
帥之出戰梁主不從命王瓚驅市人乘城為備梁主
疑諸兄弟乘危謀亂盡殺之梁主登建國樓或請幸
洛陽收軍拒唐唐雖得都城勢不能久留或請幸段
凝軍指揮使皇甫麟曰凝本非將材官由幸進今危
窘之際望其臨機制勝轉敗為功難矣且凝聞彥章
軍敗其膽已破安知能終為陛下盡節乎趙巖曰事
勢如此一下此樓誰心可保梁主復召宰相謀之鄭
珏請自懷傳國寶詐降以紓國難梁主曰今日固不
敢受寶但此策竟可了否珏俛首久之曰但恐未了
左右皆縮頸而笑梁主日夜涕泣不知所為置傳國
寶於臥內忽失之已為左右竊之迎唐軍矣趙巖曰
吾待溫許州厚必不負我遂奔許州梁主謂皇甫麟
曰吾不能自裁卿可斷吾首麟泣曰臣為陛下揮劍
死唐軍則可矣不敢奉此詔梁主曰卿欲賣我邪麟
欲自到梁主持之曰與卿俱死麟遂弑梁主因自到

梁主為人溫恭儉約無荒淫之失但寵信趙張使擅
威福踈棄敬李舊臣不用其言以至於亡李嗣源軍
行五日至大梁王瓚開門出降是日唐主亦至入自
梁門嗣源迎賀唐主喜不自勝手引嗣源衣以頭觸
之曰吾有天下卿父子之功也天下與爾共之李振
謂敬翔曰有詔洗滌吾輩相與朝新君乎翔曰吾二
人為梁宰相君昏不能諫國亡不能救新君若問將
何辭以對是夕未曙或報翔曰李太保已入朝矣翔
嘆曰李振謬為丈夫國亡君死何面目入建國門乎
乃縊而死趙巖至許州溫昭圖斬之復名韜詔漆朱
友貞首函之

集覽

常道築室三年不成注見漢章帝
元和三年作舍道邊三年不成馬

蹟注見前唐昭宗乾寧三年傳其創傳或作敷創初
莊反傷也按此止是刀割字選信烈即李嗣源也本
番人無姓氏以騎射事李克用克用養為子賜姓李
名嗣源邈音墨角反佶音其吉反方陳陳讀曰陣方

陳並陣而進也大社記郊特牲篇天子大社必受霜露風雨以達天地之氣也注大社王為羣姓所立大

音質實

瀛涿二州名瀛注見漢帝立更始二年河間涿注同上年黎陽縣名注見漢成帝綏和三

年解體注見漢桓帝延熙二年中都縣名注見周安王十二年平陸南城即德勝南城注見龍德元年要

害注見漢文帝十一年旋踵注見漢昭帝元平元年白馬津名注見漢王邦三年曹州注見漢光武建武

八年濟陰良平謂漢之張良陳平洛陽縣名注見周顯王三年溫許州謂溫昭圖許州注見漢後主建興

十年許昌敬李謂敬翔李振

書法

不書伐梁何未嘗伐也故首書救鄆州中書入末書遂滅梁書救鄆書遂滅所以志唐之

非素畫也書入所以志梁之無備禦也然則唐之得梁為幸而梁之失國非不幸矣

發明

梁篡弒之國初無足取然彥章武人能死於所事其視當時擇利叛主者則有間矣故綱

目亦書而予之也○又曰亞子是時已屢失策勢且岌岌魯不如初年之英明然朱氏惡周必復天理不容是以唐人取之如拾芥耳故夫書唐主救鄆州則見其非大舉伐梁之意書唐主入大梁則見梁人畧無守禦之意書梁主瑱自殺則見瑱孤立無與之意書唐遂滅梁則見其遂事滅國謀非素定之意然則梁之亡也梁自亡耳固非唐人能滅之也

梁政凝降唐

段凝入援以杜晏球為前鋒至封丘遇李從珂晏球先降凝衆五萬亦降帝勞之賜姓名李紹欽凝出入公卿間揚揚自得無愧色梁之舊臣皆欲亂其面挾其心晏球亦賜姓名李紹虔

質實

封丘名

注見唐僖宗
中和四年

唐貶梁宰相鄭珣以下十一人

以其世受唐恩
而仕梁貴顯也

敬翔李振趙巖張漢傑等伏誅夷其族

敬翔既死段凝杜晏球上言偽梁要人趙巖張漢傑等竊弄威福殘蠹羣生不可不誅詔敬翔李振首佐朱溫共傾唐祚可並族誅巖至許州亦為溫韜所殺

書法

四人或自殺或死于外或正典刑其等書伏誅何罪可誅也敬翔之拒李振不可謂不知

耻而其自殺疑亦不可與趙巖之竄同科例以伏誅書何也敬翔教溫篡竊雖不為李振能逃教盜

之罪乎例書伏誅綱目之懲惡嚴矣誅不書唐蒙上文也

發明

敬翔始終為梁已先縊死李振為唐鴟梟又降于敵趙巖張漢傑梁之姦臣國亡不死綱

目不復分別槩以伏誅書之者蓋以傾覆唐祚敬翔實為之謀主且朱溫兇暴殘忍翔振安為之臣傳虎以翼雖其晚節末路向背不同要之均事逆賊均為篡國之人此綱目所以等而書之又何別異之有哉

唐毀梁宗廟追廢朱溫朱友貞為庶人

書法

莽書毀漢高廟罪之也此書毀梁宗廟何予之也然則晉追廢從珂書唐主溫則曷為以

故姓名書賊也非從珂比矣終綱目書毀先代廟二新莽始建國二年是年

發明

三代既遠聖王不作兩漢以還篡竊相踵逆亂之徒橫行於天下忠臣義士飲恨而莫伸

蓋自曹馬以降未有一人能遂討賊之志者朱氏滅唐獨李克用父子極力致討幸而卒耐其志真可謂千古之遇矣向使滅梁之後宣明大義舉行殘戮汙瀆之典剖棺焚屍告之昭哀之廟以謝祖宗在天之靈則朱溫弑二君一后滅唐三百年社稷之罪亦可少快臣民之憤而後世逆亂之徒亦或知所戒矣夫何莊宗雖有是志竟移於姦佞者之言而止故綱目於此書唐毀梁宗廟追廢朱溫等為庶人而不及其他蓋亦予之而不盡焉者然後知予其所已行則惜其所未行者矣豈不深哉可歎

梁諸藩鎮入朝于唐者皆復其任考異

提要及微本無者字

宋州節度使袁象先首來入朝輦珍貨數十萬徧賂劉夫人及權貴伶官宦者中外爭譽之恩寵隆異

質實

宋州注見漢後主延熙十八年

唐以郭崇韜守侍中

崇韜權兼內外謀猷規益竭忠無隱頗亦薦引人物豆盧革受成而已無所裁正

梁河南尹張宗奭入朝于唐

宗奭來朝復名全義唐主欲發梁太祖墓斲棺焚屍全義言朱溫雖國之深讐然其人已死刑無可加屠滅其家足以為報乞免焚斲以存聖恩唐主從之但鏹其闕室削封樹而已胡氏曰朱全忠併弑二主毀唐宗社凶悖殘暴無與為比莊宗列數其罪誕告多方發冢斲棺焚屍而颺之行諸其宮室然後快人心

合天意垂後來亂賊之監全義懷私甘辱豈知帝王懲戒之大方莊宗過聽其言而畧於討惡之典惜哉

集覽

錐其闕室錐初諫反損削之也謂毀其觀闕官室削封樹削除去之也禮地官封人掌設王之

社壝為畿封而樹之注聚土曰封畿上有封若今時界矣凡封國建諸侯立其國之封疏云畿上為溝積

土於外以為封又樹木以為阻固汙正誤削封樹今按唐主欲

諸其宮室注見宋文帝元嘉三十年發梁太祖墓斷棺焚屍惑于張全義之言但錐其闕室削封樹而已然則闕室封樹皆指墓上事封謂聚

土之墳樹謂所植松栢今皆削之猶言不封不樹也今本樹或誤作柱

質實

河南府名注見秦莊

襄王元年三川一統志云梁太祖墓號極陵在河南府城東南

書法

於是宗奭復名全義矣其以宗奭書何罪宗奭也曷為罪之先是朱溫避暑其第淫汙殆

遍綱目嘗書曰梁主避暑于河南尹張宗奭第矣
及是宗奭復名全義入朝于唐唐主將戮溫屍以
豁衆憤全義力救止之是黨賊而忘其耻也綱目
不書全義書其故名若曰是嘗書梁主避暑其第
者所以志忘耻懷私之罪也後此則
書全義從其名矣綱目之旨深哉

唐加李嗣源中書令

楚王殷遣使入貢于唐質實

楚州名注見宋孝
武大明三年山陽

殷遣其子希範入見納行
營都統印上本道將吏籍

吳遣使如唐

唐遣使以滅梁告吳徐溫尤嚴可求曰公前沮吾計
今將奈何可求笑曰聞唐主始得中原志氣驕滿御

下無法不出數年將有內變吾但當卑辭厚禮保境安民以待之耳唐使彌詔吳人不受唐主易其書用敵國之禮吳人復書稱大吳國主辭禮如牋表

吳貶鍾泰章為饒州刺史

吳人有告壽州團練使鍾泰章侵市官馬者徐知誥遣王稔代之以泰章為饒州刺史徐溫召至金陵使陳彥謙詰之三不對或問泰章何以不自辨泰章曰吾在壽州去淮數里步騎五千苟有他志豈王稔單騎能代之乎我義不負國雖黜為縣令亦行況刺史乎何為自辨以彰朝廷之失知誥請收泰章治罪徐溫曰吾非泰章已死於張顥之手今日富貴安可負之命知誥為子景通娶其女以解之時張崇在廬州貪暴不法廬江民訟縣令受賕知誥遣侍御史知雜事楊廷式往按之廷式曰雜端推事其體至重職業

不可不行知誥曰何如廷式曰械繫張崇使吏如昇
州簿責都統知誥曰何至是廷式曰縣令微官張崇
使之取民財轉獻都統耳豈可**集覽**簿責以文簿次
捨大而詰小乎知誥以是重之**第一一責之**

質實

壽州注見秦王政六年壽春饒州注見梁武帝
太清元年鄱陽廬州注見漢景帝五年廬江縣

名注見唐僖宗光啟三年昇州
注見漢獻帝興平二年金陵

彗星見

彗出與鬼長丈餘蜀司天監言國有大災蜀主詔於
玉局觀設道場右補闕張雲上疏以為百姓怨氣上
徹於天故彗星見此乃亡國之徵非**質實**彗星注見
祈禳可弭蜀主怒流雲黎州道卒**質實**周顯王八

年黎州注見漢武
帝元鼎六年沉黎

書法

於是彗出與鬼并鬼相近未幾而蜀亡則彗為蜀亡之兆明矣不書出與鬼何若曰天有

大戒凡有國者皆當有警戒之心綱目惡傳會故不書所出終綱目書彗十有七詳周顯王八年舍

是無書

彗者矣

發明

三皇邁德七曜順軌蓋聖賢在位則日星為之明潤焉有帝王建功立業之始而天變已

形於上者哉是時唐方滅梁使其果足以任代天子民之職則無是矣書彗星見而不聞有恐懼脩省之實未幾蜀亡而唐亦不免海內愈亂不可救止人主觀此可不克謹天戒也哉

十一月唐以李紹欽為泰寧節度使

紹欽因伶人景進納貨於宮掖故有是命唐主幼善音律或時自傳粉墨與優人共戲於庭以悅劉夫人

優名謂之李天下嘗自呼曰李天下李天下優人敬
新磨遽前批其頰唐主失色新磨徐曰理天下者只
有一人尚誰呼邪唐主悅厚賜之嘗畋中牟踐民稼
中牟令當馬前諫曰陛下為民父母奈何毀其所食
使轉死溝壑乎唐主怒叱去將殺之新磨追擒至馬
前責之曰汝為縣令獨不知吾天子好獵邪奈何縱
民耕種以妨吾天子之馳騁乎汝罪當死因請行刑
唐主笑而釋之諸伶出入宮掖侮弄縉紳羣臣憤嫉
莫敢出氣亦有反相附託以希恩澤者四方藩鎮爭
以賄賂結之其尤蠹政害人者景進為之首進好采
間閭鄙細事以聞唐主亦欲知外間事遂委進以耳
目進每奏事嘗屏左右問之由是進得施其譏慝于
豫政事自將相**集覽**批其頰批偏迷**質實**
大臣皆憚之反以手擊之也**質實**中牟縣名

帝初平三年縉紳注見漢武帝元朔
元年間閭注見唐昭宗天復元年朔

唐朱友謙溫韜入朝

友謙入朝唐主與之宴寵錫無算賜姓名曰李繼麟
康延孝亦賜姓名李紹琛賜溫韜姓名曰李紹冲紹
冲多齎金帛賂劉夫人及權貴伶官旬日復遣還鎮
郭崇韜曰溫韜發唐山陵殆徧其罪與朱溫相埒耳
何得復居方鎮天下義士其謂我何上曰入汴之初
已赦其罪竟遣之胡氏曰罪人不可不誅赦令不可
不守二者將何處必於未赦之前揆情法審輕重而
區別之使預赦者無可誅之罪被刑者無可恕之人
則一舉而兩得矣然莊宗所見又異乎此使
溫韜不賂伶官貨官姬必不以赦為言也
集覽
埒音劣說文庫埒也
埒音劣說文庫埒也
譬如肩與垣相等

發明

前書華原賊溫韜發唐諸陵此書溫韜入朝
則唐之失刑為可知矣然則明年遣使按視

果何

益哉

唐省文武官

中書奏以國用未充請量留三省
寺監官餘並停詔從之人頗咨怨

唐廢北都為成德軍梁東京為宣武軍以宋州為歸德

軍質實

成德軍注見漢光武建武九年常山宣武軍注見周顯王二十九年大梁歸德軍注見漢後主

延熙十八年宋州

唐以趙光胤韋說同平章事豆盧革判租庸兼鹽鐵轉

運使

議者以郭崇韜不能知朝廷典故當用前朝名家以佐之或薦禮部尚書薛廷珪太子少保李琪耆宿有文崇韜奏廷珪浮華無相業琪傾險無士風尚書左丞趙光胤廉潔方正有宰相器豆盧革薦禮部侍郎韋說諳練朝章故有是命光胤光逢之弟也性輕率喜自矜說謹重守常而已光逢自梁朝罷相杜門不交賓客光胤時徃見之語及政事他日光逢署其戶曰請不言中書事孔謙畏張憲公正欲專使務言於郭崇韜奏為東京副留守崇韜復奏以豆盧革判租庸兼諸道鹽鐵轉運使謙彌失望

質實

李琪

燉煌人

唐荆南節度使高季興入朝

高季昌避唐朝諱更名季興欲自入朝梁震曰唐有吞天下之志嚴兵守險猶恐不自保况數千里入朝

乎且公朱氏舊將安知彼不以仇敵相遇矣季興不從遂入朝唐主待之甚厚從容問曰朕欲用兵於吳蜀二國何先季興以蜀道險難取乃對曰吳地薄民貧克之無益不如先伐蜀蜀土富饒主荒民怨伐之必克克蜀之後順流而下質實荆南節度使注見漢取吳如反掌耳唐主曰善質實荆南帝建安十三年南郡從容注見秦二世三年

唐復以長安為西京京兆府質實

京兆府注見唐玄宗開元十一年

十

二月唐遷都洛陽

從張全義之請也

唐復行舊律令

御史臺奏朱溫刪改本朝律令格式悉收舊本焚質之聞定州敕庫所藏具在乞下本道錄進從之

實

定州注見周威烈王二十三年中山

唐李繼韜入朝赦之尋復誅

李繼韜憂懼欲走契丹會有詔徵詣闕繼韜母楊氏善蓄財家貲百萬乃與偕行齎銀四十萬兩他貨稱是大布賂遺伶官爭為之言曰繼韜初無邪謀為姦人所惑耳嗣昭親賢不可無後楊氏入宮泣請又求哀於劉夫人唐主釋之寵待如故繼韜不自安潛遣弟繼遠書教軍士縱火冀復遣已撫安之事泄被誅並斬質實他貨稱是注見唐代宗大歷十二年

吳復遣使如唐

吳復遣盧蘋使唐嚴可求預料所問教蘋應對既至皆如所料蘋還言唐主荒于游畋奢財拒諫內外皆

怨

集覽

盧蘋姓名也
蘋音頻

高季興還鎮

季興在洛陽唐主左右伶官求貨無厭季興忿之唐主欲留季興郭崇韜諫曰陛下新得天下諸侯不過遣子弟將佐入貢惟高季興身自入朝當褒賞以勸來者乃羈留不遣棄信虧義沮四海之心非計也乃遣之季興倍道而去至江陵握梁震手曰不用君言幾不免虎口又謂將佐曰新朝百戰方得河南乃對功臣舉手云吾於十指上得天下矜伐如此則他人皆無功矣其誰不解體又荒於禽色何能久長吾無憂矣乃繕城積粟招納梁舊兵為戰守之備胡氏曰勞而不伐有功而不德賢人君子尚或難之然事在

強勉而已意欲如是少忍而思之曰如是不善終忍而不為斯善矣意不欲如是少思而克之曰不如是不善終克而為之斯善矣此強勉之道也意動即行不復加思其入於不善如丸之下坂孰能禦之莊宗之失是已夫九五尊位非覬望可得聖人不以得之為喜而以處之為懼是以能濟故曰巍巍乎舜禹之有天下而不與焉又曰予臨兆民凜乎若朽索之馭六馬莊宗克梁志驕氣溢為藩鎮所窺凡所料度其應如響矜伐之為**集覽**九五尊位易乾卦九五飛龍害乃爾可不戒哉

中正
質實

江陵縣名注見漢獻帝建安十三年子臨兆民凜乎若朽索之馭六馬書五子之歌

予臨兆民凜乎若朽索之馭六馬注予五子自稱也朽腐也朽索易絕六馬易驚朽索固非可以馭馬也

以喻其危懼可畏之甚洛陽縣名注見周顯王三年解體注見漢桓帝延熙二年

書法

綱目書來朝多矣不皆書還漢河間王來朝書還卒賢王也東平王來朝書歸國重恩禮

也唐崔旰入朝書還鎮譏失刑也田弘正來朝書還鎮美忠順也劉從諫來朝書歸鎮譏取輕也周安審琦來朝書還鎮美推誠也此其書還鎮何危季興也季興將朝梁震諫不聽既至唐主惑適言欲留之以崇韜諫遣歸鎮書曰高季興還鎮幸之也而唐主之失著矣

甲後唐同光二年○是歲春正月契丹寇幽州考證冠當

申岐降後唐凡四國四鎮契丹北蕃部名注見晉安帝義熙二年幽州注見高祖武德四年

唐作入質實

岐王茂貞遣使入貢于唐

茂貞聞唐主入洛內不自安遣其子繼曦入貢上質表稱臣唐主以其前朝耆舊特加優禮賜詔不名質

實

岐國名注見
周顯王八年

唐復以宦官為內諸司使及諸道監軍

敕內官不應居外並遣詣闕至者殆千人皆給贍優厚以為腹心內諸司使自天祐以來以士人代之至是復用宦者侵干政事既而復置諸道監軍實實唐昭軍陵忽主帥怙勢爭權由是藩鎮皆憤怒

宗年號藩鎮注見
肅宗上元二年

書法

書復以何志失也天祐以來改用士人矣於是而復用宦者自此侵干朝政譖毀陵忽而

諸鎮搖
心矣

發明

唐室亡於宦者此莊宗之所知也滅梁未幾即尋覆轍故綱目書其復以宦官為諸司使

及監軍以罪之且
以見亡國之由也

唐以王正言為租庸使

孔謙復言於郭崇韜曰首座相公事繁第遠簿書留
滯宜更圖之豆盧革嘗以手書便省庫錢數十萬謙
以示崇韜革懼奏請崇韜專判租庸崇韜固辭請復
用張憲謙彌失望言於革曰錢穀細事魏都根本興
唐尹王正言操守有餘智力不足使之居朝廷猶愈
於專委方面也革言於崇韜乃留張憲於東京以正
言為租庸使正言昏懦謙利其易
集覽首座相公猶
制故也尋敕三司並隸租庸使
相第遠謂宅第遙遠便省車馬便謂擅便也省減耗
也興唐尹後唐以魏州為興唐府建東京尹府尹也

質實

魏郡興唐府名注見上同
魏郡興唐府名注見上同
漢成帝綏和二年

唐太后至洛陽

唐主遣存渥繼岌迎太后太妃於晉陽太妃曰陵廟在此若相與俱行歲時何人奉祀遂留不往惟太后

至洛陽質實晉陽縣名注見周威烈王二十三年

二月唐主祀南郊大赦考證

下當書境內

孔謙欲聚斂以求媚凡赦文所蠲者謙復徵之自是每有詔令人皆不信百姓愁怨郭崇韜頗受饋遺所親諫之崇韜曰吾祿賜巨萬豈藉外財但以偽梁之季賄賂成風今河南藩鎮皆梁之舊臣主上之仇讐也若拒其意能無懼乎吾特為國家藏之私室耳及將祀南郊崇韜獻錢十萬緡先是宦官勸唐主分天下財賦為內外府州縣上供者入外府充經費方鎮貢獻者入內府充宴賜於是外府常虛竭無餘而內

府山積及是乏勞軍錢崇韜言於上曰臣已傾家所有以助大禮願陛下亦出內府之財以賜有司唐主默然久之曰晉陽自有儲積可令租庸輦取於是軍士皆不滿望始怨恨有離心矣

集覽

上終注見

唐憲宗元

質實

南郊注見漢後和三年

質實

主建興十五年

唐以李茂貞為秦王質實

秦州名注見漢光武建武元年天水

唐立夫人劉氏為后

郭崇韜位兼將相權侔人主性剛急遇事輒發嬖倖求多所摧抑宦官朝夕短之崇韜扼腕不能制豆盧革韋說嘗問之曰汾陽王本太原人公世家鴈門豈其支派邪崇韜因曰嘗聞先人言上距汾陽四世耳革曰然則固從祖也崇韜由是以膏粱自處多甄別流品引拔浮華鄙棄勲舊由是嬖倖疾之於內勲

舊怨之於外崇韜鬱鬱不得志與所親謀赴本鎮以避之其人曰不可蛟龍失水螻蟻足以制之先是唐主欲以劉夫人為皇后而有正妃韓夫人在太后素惡劉夫人崇韜亦屢諫唐主以是不果於是所親說崇韜曰公若請立劉夫人為皇后則伶官輩不能為患矣崇韜從之與宰相帥百官共奏請立之后生於寒微其父以醫卜為業后幼被掠得入宮性狡悍淫妬從唐主在魏父聞其貴詣魏上謁時后方與諸夫人爭寵以門地相高耻之怒曰妾去鄉時父不幸死亂兵妾哭而去今何物田舍翁敢至此命笞之宮門又專務蓄財新蘇果如皆販鬻之至是四方貢獻皆分為二一上天子一上中宮以是寶貨山積惟用寫佛經施尼師而已是時皇太后誥皇后教與制勅交行於藩鎮奉之如一勲臣畏伶官之譏皆不自安李嗣源求解兵柄不許胡氏曰崇韜希莊宗邪心請立非所宜立將以自安反以自族嗚呼豈不足為持祿

迷邦者之戒哉

集覽

膏粱注見宋文帝元嘉元年甄別流品注見唐宣宗大中年蘇薪柴蘇

草也**質實**

托脫注見漢武帝元朔二年汾陽王謂郭子儀鴈門郡名注見秦王政三年

發明

自古大臣權勢已隆極富貴已亢滿前無所希則必退為身慮然其為慮也思之非不深

計之非不工然異日釁之所起徃徃又自失其至深至工者焉是故人之處心行事莫若以正夫正者無所事計也行所當然而已郭崇韜佐莊宗決策滅梁遂一天下自見功高權重姦人議已而莊宗之昏為不足賴也乃為自安之計時劉氏有寵莊宗嬖之因請立為后用是以中莊宗之欲結劉氏之援其為計宜無如是之良者然卒之殺崇韜者劉氏也嗚呼正之一言其真萬世人臣處心行事之要乎

三月蜀主宴近臣於怡神亭

蜀主宴近臣酒酣君臣及宮人皆脫冠露髻喧譁自恣知制誥李龜頑諫曰君臣沈湎不憂國政臣恐啟北敵之質實沈湎注見漢成謀不聽帝永始二年

書法

譏褻也蜀主於是再書宴矣終綱目書宴十六大宴一貞觀十二年以前書宴九自隋宴外皆美也景龍四年以後書宴八皆譏也詳漢高帝五年舍是無書宴者矣

唐封高季興為南平王質實

南平郡名注見晉惠帝永興二年

唐以李存賢為盧龍節度使

李存審以不得預克汴之功感憤疾甚表求入覲許之初唐主嘗與存賢手搏存賢不盡其技唐主曰汝

能勝我當授藩鎮存賢乃什唐主至是以
存賢鎮幽州曰手搏之約吾不食言矣

質實

盧龍節度

注見漢武帝元朔二年肥如克汴猶言
滅梁也食言注見晉穆帝永和十三年

唐詔銓司考覈偽濫

唐末喪亂縉紳之家或以誥勅鬻於族姻遂亂昭穆
至有舅叔拜甥姪者選人偽濫者衆郭崇韜欲革其
弊請令銓司精加考覈時南郊行事官千二百人注
官者纔數十人塗毀告身者十之九選人或號哭道
路或餒死逆旅

質實

昭穆注見漢光武建武十九年
告身注見陳宣帝太建九年

唐遣使按視諸陵質實

諸陵注見懿宗咸
通四年十六陵

書法

脩陵必書重山陵也終綱目書修陵者五鎮
衛一按視一詳漢獻帝初平二年舍是無書

修陵者矣

夏四月唐主加尊號

唐遣客省使李嚴如蜀

唐遣客省使李嚴使于蜀嚴盛稱唐主威德有混一天下之志且言朱氏篡竊諸侯曾無勤王之舉王宗儔請斬之蜀主不從宣徽使宋光葆言宜選將練兵屯戍邊鄙積糗糧治戰艦以待之蜀主乃以光葆為梓州觀察使嚴之行也唐主令市官中珍玩而蜀法禁錦綺珍奇不得入中國其粗惡者乃聽謂之入草物嚴還以聞唐主怒曰王衍寧免為入草人乎嚴因言衍童騃荒縱不親政務斥遠故老昵比小人其臣諂諛專恣黷貨無厭賢愚易位刑賞紊亂大貲實兵一臨瓦解土崩可翹足而待也唐主然之

質實
王勤

注見漢獻帝建安元年梓
州注同上十八年梓潼

發明

一不直曰遣使如蜀而必曰遣客省使如蜀者
一以著官人之禍一以著亡蜀之因耳若夫

李嚴能言蜀主之失而不能知唐主之失
則亦可謂明於知彼而暗於知己者矣吁

唐秦王李茂貞卒

遺奏以其子繼
曦權知軍府事

唐澤潞軍亂

初安義牙將楊立有寵於李繼韜韜繼韜誅常邑邑思
亂會發安義兵戍涿州立因聚謀攻城焚掠市肆自
稱留後表求旄節詔以李質實
嗣源李紹榮張廷蘊討之質實
澤潞二州名注見梁
主瑱龍德二年旄節

注見德宗貞元十六年

唐貸民錢

孔謙貸民錢使以賤估償絲屨撤州縣督之知汴州盧質言梁趙巖為租庸使舉貸誅歛結怨于人今陛下革故鼎新為人除害而有司未質實汴州注見周改其所為是趙巖復生也不報顯王二十九

年大梁陛下注見漢光武建武二十七年

書法

嘗書貸王侯半租矣漢桓帝延熹四年又嘗書貸商稅富人錢穀矣僖宗乾符五年譏取

民也於是貸與民錢是年其予之歟強貸之錢而使以賤估償絲巧取亦甚矣故書譏之終綱目書貸三取予雖異皆譏也

發明

前書以王正言為租庸使猶未見其掎剝之失至是書貸民錢則誅求侵刻之患作矣雖

欲不亡不可得也

五月唐以伶人陳俊儲德源為刺史

初胡柳之役伶人周匝為梁所得唐主每思之入汴之日匝謁見泣言臣所以得生皆梁教坊使陳俊內園使儲德源之力也願乞二州以報之唐主許之郭崇韜曰陛下所與共取天下者皆英豪忠勇之士今大功始就封賞未及一人而先以伶人為刺史恐失天下心以是不行踰年伶人屢以為言唐主謂崇韜曰吾已許周匝矣公言雖正然當為我屈意行之故有是命時親軍有百戰未得刺史者莫不憤歎胡氏曰莊宗知崇韜之言正而竟違之所以然者不知克己之道也克己者自勝其私意也人有私意有公心

克之久則公心大莫之克則私意專自
身及家達之天下治與亂之源本也
質實胡柳之

梁太祖開平四年伶人
注見高宗咸亨三年

書法

直書其事而貶義自見矣
莊宗之不終伶人實為之

發明

賢者仕於伶官古亦有之未聞用伶人為刺
史者也揭而書之所以志唐主亡國之本

唐詔州鎮無得修城毀其守具

唐主以潞州叛故有是詔右諫議大夫薛昭文上疏
曰今諸道僭竊者尚多征伐之謀未可遽息又士卒
久從征伐賞給未豐宜加頒賚又河南諸軍皆梁之
精銳恐僭竊之國潛以厚利誘之宜加收撫又戶口
流亡者宜寬徭薄賦以安集之又土木不急之役宜
加裁省又擇隙地牧馬勿使踐京畿民田皆不從

質實

京畿注見太宗貞觀五年

書法

此始皇壞城郭決隄防之遺意也於是再見而秦唐乃亡於長驅之兵則多防亦何益哉

書識之也

契丹寇幽州考證

寇當作唐

○唐以李繼暉為鳳翔節度

使質實

鳳翔節度注見周顯王八年岐

○唐以曹義金為歸義節度使

時瓜沙與吐蕃雜居義金遣使間道入貢故命之

集覽

瓜沙二州皆古西戎地瓜本漢敦煌郡沙

本漢張掖郡五代晉高居誨使于闐記自靈州過黃河行五百里至涼州又西五百里至甘州甘州西北五百里至肅州西渡金河西百里出天門關又西百里出玉門關經吐蕃界西至瓜

質實

義歸

節度注見漢武帝元朔三年敦煌一統志云瓜沙二州名瓜古西戎地名漢為敦煌郡地晉分置晉昌郡
後魏屬常樂會稽二郡隋屬敦煌郡唐初置瓜州後陷於吐蕃宋時為西夏所據元徙居民於肅州但名存而已故城在肅州衛城西五百五十六里沙注見漢武帝元朔三年敦煌吐蕃西羌部名注見太宗貞觀八年

唐討潞州平之

李嗣源軍前鋒至潞州日已暝張廷蘊帥麾下壯士坎城而上即斬關延諸軍入比明嗣源紹榮至城已下矣嗣源等不悅六月斬楊立節實也比明言天將曉唐主以潞州城池高深悉夷之實也唐下注見漢獻帝建安十四年

六月唐以李嗣源為蕃漢馬步總管

秋七月唐發兵塞決河

梁所決河連年為曹濮患命將軍
婁繼英督汴滑兵塞之未幾復壞
質實汴滑二州名
王二十九年大梁滑注
見隋恭帝皇太二年

八月唐以孔謙為租庸使

孔謙復短王正言於郭崇韜又厚賂伶官求租庸使
終不獲意快快表求解職唐主怒將寘於法景進救
之得免會正言病風恍惚景進又以為言乃以謙為
租庸使孔循為副使循即趙殷衡也梁亡復其姓名
謙自是重斂急徵以充唐主之欲民不聊生賜號豐
財贍國功臣天平節度使李存霸等言屬州多獮直

奉租庸使帖指揮公事使司不知有紊規程租庸使
奏近例皆直下勅朝廷故事制敕不下支郡牧守不
專奏陳今兩道所奏迺朝廷舊規租庸所陳是偽庭
近事自今支郡自非進奉皆須本道騰奏租庸徵催
亦須牒觀察使雖
有此敕竟不行
質實
恍惚注見肅宗寶應元年元
平節度注見漢獻
帝興平元年東平

唐主獵于近郊

時唐主屢出遊獵傷民禾稼洛陽令何澤遮馬諫曰
陛下賦歛既急今稼穡將成復蹂踐之使吏何以爲
理民何以爲生臣願
先賜死唐主慰遣之
質實
州人
何澤廣

蜀中書令王宗儔卒

宗儔以蜀主失德與王宗弼謀廢立宗弼猶豫未決宗儔憂憤而卒宗弼謂宋光嗣等曰宗儔教我殺爾曹今日無患矣光嗣輩泣謝宗弼子承班謂人曰吾家難乎免矣

書法

宗儔本謀廢立未發而卒則其卒之何宗儔忠臣也其謀廢立為社稷計蓋可與權者使

其謀早決蜀未必遽亡矣綱目書卒書官惜之也

冬蜀以宦官王承休為龍武指揮使

承休請擇諸軍驍勇者置龍武軍給賜優異以承休為都指揮使裨將安重霸以狡佞賄賂事承休承休悅之以為已副舊將無不憤耻

吳越入貢于唐

吳越王鏐復修職貢于唐唐因梁官爵而命之鏐厚
貢獻並賂權要求金印玉冊有司言故事惟天子用
玉王公皆用竹
集覽職貢注見漢文帝元年玉
冊唐主曲從之
冊見唐代宗大歷十四年

吳王如白沙

吳王如白沙觀樓船更命曰迎鑾鎮徐溫來朝先是
溫以親吏翟虔為閣門使使察王起居防制甚急至
是王對溫名雨為水溫請其故王曰翟虔父名吾諱
之熟矣因以虔無禮告溫頓首謝請斬之王曰遠徙
可也乃**集覽**白沙在揚州西南六十里後唐時偽吳
徙撫州楊漣置迎鑾鎮宋真宗陞為真州後陳
德林為真州守蘇子瞻有詩白沙何必
煩此翁注真州唐永正縣白沙鎮也
質實一統志云白沙
湖名在揚州興化縣東南一十里南兗州記云湖岸
有白沙鎮即此迎鑾鎮注見憲宗元和十一年揚子

縣撫州注見晉安
帝隆安二年臨川

唐主獵于伊闕

唐主獵于伊闕命從官拜梁太祖墓涉歷山險連日不止或夜合圍士卒墜岸谷死傷甚衆

集覽

伊闕注見周安王十五年

書法

前書獵于近郊矣於是再書皆譏也

蜀遣使如唐罷北邊兵

書法

於是李嚴方請伐蜀而蜀乃罷北邊兵以媚敵欲不亡得乎綱目書之所以戒無備也

○十二月蜀復以張格同平章事

初格之得罪中書吏王魯桑乘危害之及再為相杖殺之許寂謂人曰張公才高而識淺戮一魯桑他人誰敢自保此取禍之端也

書法

復以何嘗相也於是宗衍德其立已故再相之斯人為相其何救於亡哉書曰復以為相

蓋惜之也

契丹寇蔚州唐遣李嗣源禦之考異

正月契丹寇幽州五月契丹寇幽州

十二月契丹寇蔚州按凡例中國有主則外蕃曰入寇中國無主則但云入邊或云入某郡據王莽時書匈奴入塞今五季之間篡奪相循外蕃乘間入當書侵某國或云入某國某州此及上年屢書寇傳錄誤耳後清泰二年書契丹寇邊天福八年書契丹入寇開運元年書契丹寇晉澶州契丹復入寇開運三年書契丹寇定州

契丹大舉入寇天福十二年書契丹寇澠州乾祐二年
書契丹寇河北乾祐三年書契丹入寇廣順二年書契
丹寇冀州廣順三年書契丹寇定州顯德四年書契丹
北漢會兵寇周潞州並誤書寇且或但云某州不繫某
國亦闕考證寇當作質實蔚州注見楚○唐主及后如
漏也

河南尹張全義第考異

如當作幸按巡行例
第宅曰幸此誤作如

全義大陳貢獻酒酣皇后奏妾幼失父母請父事全
義唐主許之全義惶恐固辭彊之竟受后拜復貢獻
謝恩明日后命翰林學士趙鳳草書謝全義鳳奏自
古無天下之母拜人臣為父者唐主嘉其直然卒行

之質實

河南府名注見泰
莊襄王元年三川

書法

凡君入諸臣之家者譏也及后譏之譏也於
是劉后至拜全義為父又甚矣終綱目書君

入諸臣之家者五幸其府者二詳漢安帝建光元年皆譏也惟晉成帝幸司徒導府唐太宗幸房玄齡第非譏辭焉

發明

朱溫避暑于全義之家溫故盜賊無足深責今唐主又挾其后偕徃何哉淫縱相尋世變

日下書之姑以著亂亡之跡耳五季臣主亦何所譏

蜀以王承休為天雄節度使

唐僖昭之世宦官雖盛未嘗有建節者承休言於蜀主曰秦州多美婦人請為陛下采擇以獻蜀主許之故有是命又以徐延瓊為內外都指揮質實天雄節度注見使延瓊以外戚居舊將之右衆皆不平

漢成帝綏和二年魏郡

書法

唐書白志貞為浙西觀察使矣德宗貞元三年未有宦者為節度使者也宦者節度於是

始見是年特書以甚之
終綱目宦官為方鎮二

乙後唐同光三年○蜀咸康元年漢
西白龍元年○是歲凡四國四鎮

春正月唐主如興

唐

初李嗣源北征過興唐庫有供御細鎧嗣源牒副留守張憲取五百領憲以軍興不暇奏而給之至是唐主怒罰憲俸一月令自往取又以義武王都將入朝欲闢球場憲以場有即位壇不可毀請更闢場於宮西數日未成唐主命毀即位壇憲謂郭崇韜曰此壇主上受命之地若之何毀之崇韜從容言之唐主立命兩虞候毀之憲私謂崇韜
集覽義武王都義武軍曰忘天背本不祥莫大焉節度使王處直之

假子名都梁主瑱龍德元年都幽殺其父處直晉王因以都代之

二月唐以李嗣源為成德節度使

唐主以契丹為憂與郭崇韜謀以宿將零落殆盡欲徙嗣源鎮真定崇韜深以為便時崇韜領真定唐主欲徙崇韜汴州崇韜辭曰臣富貴極矣何必更領藩方且羣臣或經百戰所得不過一州臣無汗馬之勞致位至此常不自安今因委任勲賢使臣得解旄節乃大願也且汴州衝要富繁臣既不至治所徒令他人攝職何異空城非所以固國基也唐主曰卿為朕畫策保固河津直趨大梁成朕帝業豈百戰之功可比乎崇韜固**質實**真定府名注見漢光武建武九年常山

漢遣使如唐

漢主聞唐滅梁而懼遣宮苑使何詞入貢硯強弱詞還言唐主驕淫無政不足畏也漢主大悅遂不復通

集覽

何詞姓名詞音嗣

三月唐黠李從珂為突騎指揮使考證

當加嗣源養子於從珂之上○

謹按五代史從珂本王姓母魏氏少寡有子阿三年十餘明宗掠得魏氏養阿三為子冒姓李改今名是為潞王綱目於明宗書曰李克用養子於周世宗書曰周主養子此當加嗣源養子於從珂之一例也五季養子得國者有此三主夫為國家者君臣臣父父子上下相保敬其所尊愛其所親而不相害故能傳於永世莊宗承克用之業有天下之半而不知經綸大經是以身弑嗣絕而明宗繼之明宗奮於卒伍克用子養之者覲其立功以報國也入朝之日固當討誅伶人之弑莊宗者迎魏王繼岌而立之義也乃偏魏王而奪其國雖

息兵恤民史稱賢主而大義已虧不足賢矣王從珂石敬瑭劉知遠三人同事明宗從珂不思撫育之恩篡弑閔帝若敬瑭能聲其罪正其名率諸侯王而致討孰能禦之焉用區區小數召外蕃遺天下後世患至如知遠伺釁而興皆無綱常之教一以詐力劫持之何以能永世哉故異姓不可以為子詐力不可以為國建邦啟業所宜深鑑也周世宗受太祖命而繼立正也冒太祖姓非正也帝王可繼族類不可瀆若復姓柴氏而受終於太祖斯謂正矣昔者聖人為政必先正名世宗以不正之名臨郡國綱目均以養子書亦無足稱焉

唐主性剛好勝不欲權在臣下信伶官之讒頗疎忌宿將李嗣源家在太原表從珂為北京內牙指揮使以便其家唐主怒黜從珂為突騎指揮使帥數百人戍石門鎮嗣源憂恐求朝不許郭從韜亦忌之私謂人曰總管令公非久為人下者皇家子弟皆不及也密勸唐主罷其兵權因而除之不從

質實

石門

鎮注見昭宗
乾寧二年

唐遣使采民女入後宮

唐宦者欲增廣嬪御詐言宮中夜見鬼物因言咸通乾符時六宮不減萬人今掖庭空虛故鬼物遊之耳唐主乃命宦者王允平伶人景進采擇民女三千餘人以充後庭

質實

咸通懿宗年號乾符僖宗

年號掖庭宮名注見漢光武建武二年

書法

綱目書采選良家四詳晉癸巳年舍是無書采選者矣

唐復以洛陽為東都興唐為鄴都質實

東都注見秦莊襄王元年三川

鄴都注見漢成帝
經和二年魏郡

○夏四月朔日食質實

日食注見新莽天鳳

元年

○大旱

初五臺僧誠惠自言能降伏天龍命風召雨唐主親帥后妃拜之誠惠安坐不起羣臣莫敢不拜獨郭崇韜不拜會大旱迎至洛陽使祈雨數旬不雨或謂誠惠官以師祈雨無驗將焚之誠惠逃去慙懼而死

質實

五臺山名注見武宗會昌五年

五月唐太妃劉氏卒

太后自與太妃別常忽忽不樂太妃亦邑邑成疾太后欲自徃省之唐主以天暑道遠苦諫久之乃止及薨太后悲哀不食者累日自是得疾

書法

太妃立不書書卒何志太后所以殂也劉氏

妃曹氏為太后不惟劉氏無愠色而於太后情好更篤可謂賢母矣太后之如洛陽既別常不樂而妃亦邑邑成疾妃卒太后自是得疾遂殂自古嫡妾易位不相妬而和睦未有如此者綱目特書之所以示勸也

六月雨

春夏大旱至是始雨遂連雨
七十五日始霽百川皆溢

書法

春秋書六月雨志喜也此其志喜歟記異也先是書夏大旱及是而雨其為記異何雨喜

也雨而七十五日乃止百川皆溢其為異也大矣

唐主作清暑樓

唐主苦溽暑，宦者因言：「長安全盛時，宮中樓觀以百數。今日官家曾無避暑之所。」唐主乃命王允平別建一樓，宦者曰：「郭崇韜常不伸眉為孔謙論用度不足，恐陛下雖欲營繕，終不可得。」唐主曰：「吾自用內府錢，無關經費，然猶慮崇韜諫遣中使語之。」曰：「今歲盛暑，異常朕昔在河上行營，早濕被甲乘馬，親當矢石，猶無此暑。今居深宮之中而暑不可度，柰何？」對曰：「陛下昔在河上，勅敵未滅，深念離耻，雖有盛暑，不介聖懷。今外患已除，海內賓服，故雖珍臺閑館，猶覺鬱蒸也。陛下倘不忘艱難之時，則暑氣自消矣。」唐主默然。宦者曰：「崇韜之第無異，皇居宜其不知至尊之熱也。」唐主卒命允平營樓，日役萬人，所費巨萬。崇韜諫曰：「今河南水旱，軍食不充，願且息役，以俟豐年。」不聽。

質實

中使注見玄宗開元十五年，勅敵謂朱梁

吳鎮海判官陳彥謙卒

彥謙有疾徐知誥恐其遺言及繼嗣事遺之醫藥金帛相屬彥謙臨終密留書遺徐溫請以所生子為嗣

質實

鎮海軍名注見晉成帝咸和三年京口

書法

卒小國臣錄賢也綱目於五代卒小國臣十有三詳戊寅年蜀而吳居三焉陳彥謙徐溫

崇再用舍是無書卒者矣

秋七月唐太后曹氏殂

唐主哀毀五日方食

八月唐主殺其河南令羅貫

貫性彊直為郭崇韜所知用為河南令為政不避權豪伶官請託一不報皆以示崇韜崇韜奏之由是伶官切齒張全義亦惡之遣婢訴於劉后后與伶官共毀之唐主含怒未發會徃視坤陵道寧橋壞怒下貫獄明日傳詔殺之崇韜諫曰貫法不至死唐主怒曰太后靈駕將發天子朝夕徃來橋道不修卿言無罪是黨也崇韜曰陛下以萬乘之尊怒一縣令使天下謂陛下用法不平臣之罪也唐主曰既公所愛任公裁之拂衣起入宮崇韜隨之論奏不已唐主自闔殿門崇韜不得入貫竟死暴屍府門遠近冤之胡氏曰莊宗五日不食學禮者之所難也然曾子曰斷一樹殺一獸不以其時非孝也况為伶官譖毀而殺賢令乎然則莊宗之不食五日才足為小節而殺賢縣令是乃大不孝可謂不能充其類者也

質實
下

注見漢光武建武二十七年坤陵未詳處或謂即曹太后陵莫審是否

九月蜀主與太后太妃遊青城山質實

一統志云青城山在成都府灌

縣西南五十里唐杜光庭記岷山連峯接岫千里不絕青城乃第一峯也前號青城峯後名大面山山有七十

二小洞應七十二候有八大洞應八節道書以此山為第五洞天乃神僊都會之府

書法

嘗書燕主熙與其后遊白鹿山矣晉安帝元興三年於是復見凡遊譏也與后妃遊譏之

譏也終綱目書太后遊幸三梁已亥年魏太后唐穆宗長慶二年郭太后是年書與后遊幸二燕主

熙與后遊白鹿唐甲申年唐

主與其太妃如張全義第

發明

少康以一族而興夏成湯以七十里而興商蜀雖叢爾諸葛武侯嘗用之矣觸之者碎犯

之者鋤地非加廣也兵非加衆也亦以用之得其道耳自王建之歿王衍繼立首尾八載觀綱目之

所書無非亡國之事故書以宦者為將軍則近習
進矣書殺華陽尉張士喬則諫臣戮矣書北巡遣
兵侵岐則輕佻黷武矣書宴羣臣於宣華苑宴近
臣於怡神亭則沈湎無度矣書以宦者王承休為
指揮使節度使則管軍非其人矣書遣使如唐罷
北邊兵則弛備以啟敵笑至是上書遊青城山下
書唐兵伐蜀繼書蜀主東遊則蜀之亡滅無可言
者夫以一蜀之微本無足述然綱目屢書于冊蓋
欲後人知其覆亡之故殷鑒若此必憂勤圖治必
兢業保邦必畏天命之難謀必知人心之難保則
庶幾克紹丕基永終天祿其為
後王戒豈不深切著明也哉

○唐遣魏王繼岌及郭崇韜將兵伐蜀

唐主與宰相議伐蜀李紹欽素諂事宣徽使李紹宏
紹宏薦紹欽有奇才可大任郭崇韜曰段凝亡國之

將姦諂絕倫不可信也衆舉李嗣源崇韜曰契丹方
 熾總管不可離河朔魏王地當儲嗣未立殊功請以
 為都統成其威名帝曰兒幼豈能獨往當求其副既
 而曰無以易卿乃以繼岌充西川行營都統崇韜克
 都招討制置等使軍事悉以委之又以高季興克招
 討使李繼曦充轉運使李令德李紹琛張筠毛璋董
 璋李嚴皆為列將將兵六萬伐蜀仍詔季興自取夔
 忠萬三州為巡屬工部尚書任圜翰林學士李愚並
 叅預軍機崇韜以孟知祥有薦引舊恩將行言於上
 曰知祥信厚有謀可為西川帥又薦張憲謹重有識
 可為**集覽**段凝本梁將降唐**質實**夔忠萬三州夔注
 相賜姓名李紹欽見漢獻帝建安十
 九年已東忠注見玄宗開元十八
 年萬注見代宗大歷十二年南浦

冬十月蜀主東遊

安重霸勸王承休請蜀主東遊秦州毀府署作行宮
強取民間女子教歌舞圖形以遺韓昭蜀主將行羣
臣諫皆不聽太后涕泣不食止之亦不能得前秦州
節度推官蒲禹卿上表畧曰先帝艱難創業欲傳之
萬世陛下少長富貴流色惑酒無故盤游頻離宮闕
今百姓失業盜賊公行山河險固不足憑恃韓昭謂
曰吾收汝表侯主上西歸當使獄吏字字問汝承休
妻美蜀主私焉故銳意欲行十月引兵數萬發成都
武興節度使王承捷告唐兵西上蜀主不信大
言曰吾方欲耀武遂行在道賦詩殊不為意
武興節度注見梁
武帝中大通六年

十一月唐師滅蜀蜀主王衍降

唐李紹琛攻蜀威武城城降得糧二十萬斛紹琛縱
其敗兵萬餘人逸去因倍道趣鳳州李嚴飛書以諭

王承捷李繼曦竭鳳翔蓄積以饋軍不能充人情憂
恐郭崇韜入散關指其山曰吾輩進無成功不復得
還此矣當盡力一決今饋運將竭宜先取鳳州掠其
糧諸將皆言蜀地險固未可長驅崇韜以問李愚愚
曰蜀人苦其主荒淫莫為之用宜乘其人情崩離風
驅霆擊彼皆落膽雖有險阻誰與守之兵勢不可緩
也崇韜倍道而進王承捷以鳳興文扶四州印節迎
降得兵八千糧四十萬斛崇韜曰平蜀必矣蜀主至
利州遇威武敗卒始信唐兵之來乃以王宗勳王宗
儼王宗昱為三招討將兵三萬逆戰兵皆怨憤曰龍
武軍糧賜倍於他軍他軍安能禦敵紹琛等克興州
與戰三泉大敗之又得糧十五萬斛蜀主聞宗勳等
敗倍道西走斷桔栢津浮梁命王宗弼守利州李紹
琛晝夜兼行趣利州宋光祿遺郭崇韜書請兵不入
境當舉巡屬內附苟不如約則背城決戰崇韜納之
繼岌至興州光祿及諸城鎮皆望風款附王承休與

安重霸謀掩擊唐軍重霸曰擊之不勝則大事去矣然公受國恩聞難不可不赴願與公俱西承休以為然使以兵從將行重霸拜於馬前曰若從開府還朝誰當守此開府行矣重霸請為公守之承休無如之何遂行重霸遂以秦隴降唐高季興常欲取三峽畏蜀將張武不敢進至是乘唐兵勢自將水軍上峽取施州武以鐵鎖斷江路季興遣勇士乘舟斫之會風大起舟絙於鎖不能進退季興輕舟遁去既而夔忠萬州遣使詣繼岌降崇韜遺王宗弼等書為陳利害宗弼棄城歸三招討追及之相持而泣遂合謀送款於唐蜀主至成都百官及後宮出迎蜀主入妃嬪中作回鶻隊入宮數日宗弼亦至登太玄門嚴兵自衛劫遷蜀主及太后後宮諸王于西宮收其璽綬及內庫金帛歸其家子承涓入宮取蜀主寵姬數人以歸李紹琛進至綿州蜀斷綿江浮梁水深無舟楫紹琛謂李嚴曰吾懸軍深入利在速戰乘蜀人破膽之時

但得百騎過鹿頭關彼且迎降不暇若俟修繕橋梁
必留數日或教王衍堅閉近關折吾兵勢儻延旬浹
則勝負未可知矣乃與嚴乘馬浮度江從兵得濟者
僅千人溺死者亦千餘人遂入鹿頭關據漢州宗弼
遣使勞軍且以蜀主書遺李嚴曰公來吾即降或謂
嚴公首建伐蜀之策蜀人怨公深入骨髓不可往嚴
不從欣然馳入成都撫諭吏民告以大軍繼至悉命
撤去樓櫓蜀主命翰林學士李昊草降表又命平章
事王鎔草降書遣兵部侍郎歐陽彬奉之以迎繼岌
崇韜宗弼斬宋光嗣景潤澄李周輅歐陽晃函首送
繼岌又責韓昭佞諛梟于金馬坊門遣使奉牋以後
官珍玩賂繼岌崇韜求西川節度使繼岌曰此皆我
家物奚以獻為留其物而遣之繼岌至成都李嚴引
蜀主及百官儀衛出降蜀主白衣首經銜璧牽羊百
官衰經徒跣與觀號哭俟命繼岌受璧崇韜解縛焚
觀承制釋罪君臣東北向拜謝大軍入成都崇韜禁

侵掠市不改肆自出師至是凡七十日得節度十州
六十四縣二百四十九兵三萬鎧仗錢糧金銀繒帛
共以千萬計高季興聞蜀亡方食失匕箸曰是老夫
之過也梁震曰不足憂也唐主得蜀益驕亡無日矣

安知其不為吾福楚王殷上表
願上印綬以保餘齡優詔諭之

集覽

散開注見漢光武建武二年結

栢津津水渡也在利州昭化縣東回鶻隊戲名也隊
謂羣隊旬浹旬十日也浹即叶反周徧也十日干一

周曰浹日銜璧古者相見之禮皆有所執以為贄公
侯伯子男執玉賈逵曰銜璧者蓋以手縛於後不能

執璧故銜之牽羊賈逵曰示服為臣隸也與櫬注見
陳宣帝太建十一年七箸七卑履反匙也箸直慮反

與箸同史記周勃世家尚席取箸記曲禮曰飯黍毋
以箸注箸飯鼓也又曰羹之有菜者用挾注挾箸也

今人或謂箸為挾提
挾吉叶反又音甲

質實

威武城未詳處所鳳興文
扶四州鳳注見梁武帝中

大通六年南岐興注見晉懷帝永嘉四年畧陽文注
見漢後主建興元年陰平扶注見代宗大曆五年三
泉縣名注見僖宗光啟二年三峽注見宋明帝泰始
二年施州注見中宗嗣聖三年璽綬注見漢光武建
武三年綿州注見漢後主炎興元年涪縣綿江注見
憲宗元和元年浮梁注見周世宗顯德三年鹿頭關
注見僖宗光啟三年漢州注見漢成帝鴻嘉三年廣
漢西川節度注見晉武帝泰始八年益州袁經注見
梁孝元帝
承聖三年

書法

王衍即位以來綱目凡十六書蜀事而書用
宦官者三遊宴者五殺諫臣廢后者各一餘

則用小人而已若是而有不亡者乎唐師既臨方
且東遊不顧未有沈酒無懼如王衍者矣綱目上
書伐蜀次書東遊下書滅蜀間雖有事不書所以
著王衍之慢為後世戒也綱目書滅國未有先書

滅後書降者此其先書滅何蜀無抗者則已滅矣
滅不繫其降也是故隋師滅陳先書滅後書獲隋
文帝開皇九年唐師滅蜀先書滅後書降是年一
先一後綱目之權衡審矣終綱目書遊八詳泰始
皇二十九年舍
是無書遊者矣

發明

王衍亦嘗遣兵逆戰皆不復書而直書唐師
滅蜀者見其滅亡之易也滅者亡國之善詞

必其臣主同力死于社稷乃足稱是今蜀既無人
守禦已不可謂之同力而又繼書王衍出降則亦
不得謂之死于社稷矣此固
書法之意也於王衍乎何譏

十二月唐以董璋為東川節度使

平蜀之功李紹琛為多位董璋上而璋素與郭崇
善崇韜數召璋與議軍事紹琛心不平謂曰吾有平

蜀之功公等樸樸相從反咕囁於郭公之門謀相傾害吾為都將獨不能以軍法斬公邪璋訴於崇韜十月崇韜表璋為東川節度使解其軍職紹琛愈怒曰吾冒白刃臨險阻定兩川璋乃坐有之邪乃見崇韜言東川重地任尚書有文武才宜表為帥崇韜怒曰紹琛反邪何敢違吾節度紹琛懼而退初唐主遣宦者李從襲等從繼岌繼岌雖為都統軍中制置一出郭崇韜將吏賓客趨走盈庭而都統牙門索然從襲等固耻之及破蜀蜀之貴臣大將爭以寶貨妓樂遺崇韜及其子廷誨繼岌所得不過匹馬束帛唾壺塵柄而已從襲等益不平王宗弼賂崇韜求為節度使崇韜陽許之既而久未得乃帥蜀人列狀見繼岌請留崇韜鎮蜀從襲等因謂繼岌曰郭公父子專橫今又使蜀人請已為帥其志難測王不可不為之備繼岌謂崇韜曰主上倚侍中如山嶽豈肯棄之邊塞之域乎且此非余之所敢知也請諸人詣闕自陳由

是繼炭與崇韜互相疑貳

集覽

撲音卜速說文撲檍檍小木也詩野有死麕林有撲檍檍亦作邀漢

書息夫躬上言諸曹以下撲邀不足數顏師古曰撲邀短小貌帖囁注見敬宗寶歷二年任尚書工部尚

書任圜也塵柄注見齊

質實

東川第度注見漢獻帝建安十八年兩川謂東

川西

蜀王宗弼王承休伏誅

崇韜徵犒軍錢數萬緡於宗弼宗弼斬之士卒怨怒夜縱火誼譟崇韜欲誅宗弼以自明白繼炭收宗弼等數其不忠之罪族誅之蜀人爭食宗弼之肉承休等至繼炭亦斬之

書法

不書唐誅承上文也

發明

此二人者誤蜀者也故雖崇韜挾私殺之亦書伏誅以正其罪

閩王王審知卒子延翰立考異

立當作嗣

考證

當去王字

質實

閩國

名注見漢武帝建元三年閩中

○唐以孟知祥為西川節度使質實

西川

節度注見晉武帝泰始八年益州

唐以北都留守孟知祥為西川節度使議選代者樞密承旨段徊等惡鄴都留守張憲不欲其在朝廷皆曰憲雖有宰相器然宰相在天子目前事有得失可以改更北都獨繫一方安危其任尤重非憲不可乃徙憲為太原尹王正言為興唐尹史彥瓊為鄴都監軍正言昏耄彥瓊本伶人有寵遂專六州之政威福自恣陵忽將佐正言以下皆諂事之

唐主獵於白沙

初唐主得魏州銀槍效節都近八千人以為親軍夾河之戰屢立殊功常許以減梁之日太加賞賚既而河南平雖賞賚非一而士卒恃功驕恣無厭更成怨望是歲大饑民多流亡租賦不充倉廩空竭孔謙日於上東門外望諸州漕運至者隨以給之軍士乏食有雇妻鬻子者老弱餒死流言怨嗟而唐主遊畋不息獵于白沙後宮畢從六日而還時大雪吏卒有僵仆者伊汝間饑尤甚衛兵所過責其供餉不得則壞其什器撤其室

集覽

伊汝伊水在今河南域中禹貢廬甚於寇盜蔡氏傳曰按山海經熊耳之山

伊水出焉東北至洛陽縣西北入于洛也汝水注見漢成帝綏和二年汝潁什器注見漢後主建興六年什質實流言注見中宗嗣聖九年伊汝二水名伊注見漢高后三年汝注見梁武帝普通六年河

南道名注見宋主昱元徽元年白沙疑是地名未詳處所

書法

唐主於是三書獵矣終綱目書獵者九漢桓帝居其三唐太宗居其三莊宗居其三自太

宗外皆譏也舍是無書獵者矣

漢白龍見

漢主改
名龔

集覽

改名龔一本龔作龔刊誤也按南漢主初名巖更名涉又因白龍見更名龔至

晉高祖天福六年以龔名不利乃自造龔字而名之讀若儼音

書法

終綱目書龍見十有三詳漢惠帝二年舍是無書龍見者矣

長和求昏於漢

長和驃信鄭旻求昏于漢漢主以其集覽驃信注見增城公主妻之長和即唐之南詔也前唐懿宗

咸通

質實

長和南夷國名注見玄宗開元二十六年一統志云增城本秦番禺縣地名漢末析

置此縣屬南海郡晉於縣置東官郡隋初廢郡以縣屬廣州唐宋元俱仍其舊國朝因之改屬廣州府

閏月唐詔罷折納紐配法

唐主以軍儲不足謀於羣臣吏部尚書李琪上疏曰古者量入以為出計農而發兵故雖有水旱之災而無空乏之憂近代稅農以養兵未有農富給而兵不足農捐瘠而兵豐飽者也今縱未能蠲省租稅苟除折納紐配之法農亦可以小休矣唐主即敕有司從之然竟不能行唐主又欲如汴州諫官上言不如節儉以足用自古無就食天子今楊氏未減不宜示以虛實乃止

發明

黃放白催之弊其來久矣此書詔罷折納配法其文甚美然竟不能有所施行故於分

注備載其實而於綱目大書以著其虛文也

唐遣宦者馬彥珪使蜀軍

郭崇韜素疾宦者嘗密謂魏王繼岌曰大王他日得天下驍馬亦不可乘況任宦官宜盡去之專用士人呂知柔竊聽聞之由是宦官皆切齒時蜀中盜賊群起崇韜恐大軍既去更為後患命任圜張筠分道招討以是淹留未還帝遣宦者向延嗣促之崇韜不出迎延嗣怒李從襲曰郭公專權如是廷誨日與軍中驍將蜀主豪傑狎飲指天畫地近聞白其父請表已為蜀帥諸將皆郭氏之黨王寄身於虎狼之口一朝有變吾屬不知委骨何地矣因相向垂涕延嗣歸具以語劉后后泣訴於唐主請早救繼岌前此唐主聞

蜀人請崇韜為帥已不平至是不能無疑聞蜀府庫之籍曰人言蜀中珍貨無筭何如是之微也延嗣曰

蜀珍貨皆入崇韜父子故縣官所得不多耳唐主遂怒及孟知祥行語之曰聞崇韜有異志卿到為朕誅

之知祥曰崇韜國之勲舊不宜有此俟臣至蜀察之苟無他志則遣還唐主許之尋復遣宦官馬彥珪馳

詣成都曰崇韜奉詔班師則已若有遷延跋扈之狀則與繼茂圖之彥珪見劉后說之曰蜀中事勢憂在

朝夕安能緩急稟命於三千里外乎后復言之唐主曰傳聞之言未知虛實豈可遽爾后不得請退自為

教與繼茂**集覽**驃馬驃慈陵反騞馬也騞居拜反今令殺崇韜俗呼為驃馬跋扈注見漢質帝本初

元**質實**成都府名注見晉武帝泰始八年益州班師注見陳後主禎明元年

書法自使其軍多矣雖藩鎮不書此其書何病唐也崇韜伐蜀有功無過徒以宦官延嗣之譖

遽遣彥珪圖之崇韜之死蜀土之亂於是始矣故謹書之書曰宦者馬彥珪病唐主之信伶官也

發明

一宦者至微遣之入蜀特稱使以書之殆若將隆指御專命然者所以著其殺招討陷冢

嗣亂蜀軍亡唐室之端也

楚鑄鉛鐵錢

楚王殷不征商旅由是四方商旅輻湊湖南地多鐵殷用高郁策鑄鉛鐵錢商旅出境無所用之皆易他貨而去故能以境內所餘之物易天下百貨國以富饒湖南民不事桑蠶郁命民輸稅者皆以帛代錢未幾民間質實輻湊注見漢文帝六年湖南道機杼大盛質實名注見宋文帝元嘉十六年

書法

梁書鑄鐵錢矣癸卯年於是再見是年終綱目書鑄鐵錢二而已

丙後唐同光四年四月明宗李嗣源天成元年吳
戊越寶正元年○是歲蜀亡閩建國凡四國三鎮 春正

月唐護國軍節度使李繼麟入朝

繼麟自恃與唐主故舊有功苦諸伶官求丐無厭遂
拒不與大軍之征蜀也繼麟聞兵遣其子令德將之
以從景進與宦官譖之曰繼麟聞大軍起以為討已
故聞兵自衛又曰崇韜與河中陰謀內外相應繼麟
聞之懼欲入朝以自明其所親止之繼麟曰郭侍中
功高於我今事勢將危吾得見主上面陳至誠則諂
人獲罪矣 質實 護國節度注見周
乃入朝 赧王十二年蒲坂

唐魏王繼岌殺郭宗韜

魏王繼岌將發成都部署已定馬彥珪至以皇后教
示繼岌繼岌曰彼無憂端安可為此且主上無敕獨

以皇后教殺招討使可乎李從襲等泣相與巧陳利害繼炭從之召崇韜計事從者李環搥碎其首並殺其子廷誨廷信推官李崧謂繼炭曰今行軍三千里外初無敕旨擅殺大將大王奈何行此危事邪繼炭曰公言是也悔之無及崧乃召書吏數人登樓去梯矯為敕書用蠟印宣之軍中粗定崇韜左右皆竄匿獨掌書記張礪詣魏王府慟哭久之繼炭命任圜代總軍政

書法

殺崇韜者劉后教也書繼炭何將在軍君命有所不受況皇后教乎繼炭知其無鑿而復為從襲等所揺則固不得不任其咎矣崇韜不書爵何罪崇韜也曷為罪之崇韜之罪莫大於請立劉后唐主之不克終劉后之貪吝實為之故前書立劉夫人為后以著崇韜之罪至其死也則削其爵

發明

崇韜之死傳教者彥珪謀殺者從襲奮搃者李環而歸惡繼岌何哉繼岌身為都帥初無

朝命曲徇官人之說輕殺大將畧無遲難之意其專輒擅殺之罪尚誰咎哉至於崇韜以將相大臣盡削其官者則以其没于貨寶輕犯近習自貽禍敗不足以勝大臣之任耳書法如此蓋亦交貶之也

唐復以故蜀樂工嚴旭為蓬州刺史

魏王獻蜀樂工唐主問嚴旭曰汝何以得質實蓬州刺史對曰以歌使之歌而善之許復故任質實注見

肅宗上元二年

書法

前書以伶人陳俊等為刺史不書梁此其書蜀何譏也莊宗親見蜀以此止既滅蜀矣改

其弊政可也而復以其故樂工為刺史書故蜀樂工書復以無改於舊之辭也功業之不終兆矣

發明

王衍以荒縱亡國凡其嬖倖之流皆當戮于境上以謝蜀人而唐主反襲其覆轍自古以

亂繼亂未有若是之甚者故雖方許蓬州之請而網目已書其為刺史以惡之也夫以樂工領郡非亂世則無此舉況又出於亡蜀之伎乎

唐殺其睦王存义及李繼麟

馬彥珪還洛陽唐主乃下詔暴郭崇韜之罪並殺其諸子朝野駭惋保大節度使睦王存义崇韜之壻也宦官言存义據臂稱冤言辭怨望唐主殺之景進言李繼麟與存义連謀宦者因共勸速除之唐主乃使朱守殷殺之復其姓名詔繼炭誅令德又詔李紹奇誅其家人於河中時諸軍饑窘妄為謠言伶官采之

以聞故崇韜友謀皆及於禍李嗣源入朝亦為謠言所屬唐主遣朱守殷察之守殷私謂嗣源曰令公勲業振主宜自圖歸藩以逖禍嗣源曰吾心不負天地禍福之來無可避皆委之於命耳時伶官用事勲舊人不自保嗣源危殆者數四質實保大節度注見漢李紹宏左右營護以是得全質實獻帝建安十七年睦州名注見憲宗元和二年河中府名注見周赧王十二年蒲坂

唐魏王繼岌發成都

繼岌留李仁罕潘仁嗣趙廷隱張業武璋李延厚成成都而還命李紹琛帥萬二千人為後軍行止常差中軍一舍

二月唐以李紹宏為樞密使○唐鄴都亂遣李紹榮招

諭之

唐魏博指揮使楊仁晟將兵戍瓦橋踰年代歸唐以鄴都空虛恐兵至為變敕留屯貝州時天下莫知郭崇韜之罪民間訛言皇后弑帝人情愈駭仁晟部兵皇甫暉與其徒夜博不勝因人情不安遂作亂劫仁晟曰主上所以有天下者吾魏軍力也今天下已定天子不念舊勞更加猜忌去家咫尺不使相見今聞皇后弑逆京師已亂願與公俱歸若天子萬福與兵致討以吾兵力足以拒之安知不更為富貴之資乎仁晟不從暉殺之又劫小校不從又殺之効節指揮使趙在禮聞亂而走暉追及示以二首在禮懼而從之亂兵遂奉以為帥焚掠貝州南趣臨清有來告者都巡檢使趙鐸等亟詣史彥瓊請授甲乘城為備彥瓊曰賊至臨清計程須六日方至為備未晚鐸曰賊既作亂必聚吾未備晝夜倍道安肯計程而行請僕

射帥衆云城鐸募勁兵千人伏於王莽河逆擊之賊既勢挫必當離散然後可撲討也必俟其至城下萬

一有奸人為內應則事危矣是夜賊前鋒攻北門彥

瓊兵潰單騎奔洛陽賊入鄴都在禮據宮城署皇甫

暉趙進為指揮使縱兵大掠王正言方據按召吏草

奏無至者正言怒其家人曰賊已入城殺掠吏皆逃

散公尚誰呼正言驚曰吾初不知也乃出府門謁在

禮再拜請罪在禮諭遣之衆擁在禮為留後張憲家

在鄴都在禮厚撫之遣使以書誘憲憲斬其使

唐主乃命歸德節度使李紹榮詣鄴都招撫

夜博博謂博塞戲也注見晉明帝太寧三年

捕博之具據按據依凭也按通作案几屬也

聞名注見梁太祖乾化二年京師注見周顯王二十

五年臨清縣名注見梁主填貞明五年貝州注見漢

帝玄更始二年清河一統志云王莽河在大名府元

城縣有屯氏大河故瀆俗云王莽河一名毛河唐代

集覽

質實

五橋

宗時朱滔攻魏州實瀕王莽河壁即此處萬一注見
高祖武德九年歸德節度注見漢後主延熙十八年
宋

唐李紹琛反於蜀魏王繼岌使工部尚書任圜討之

郭崇韜之死也李紹琛謂董璋曰公復欲咕囁誰門
邪璋懼謝罪魏王繼岌至武連遇敕使諭以令董璋
將兵誅李令德紹琛以不見委大驚俄而璋過不謁
紹琛怒謂諸將曰國家南取大梁西定巴蜀皆郭公
之謀而吾之功也至於去逆效順與國家掎角以破
梁則朱公也今朱郭皆無罪族滅歸朝之後行及我
矣冤哉天乎奈何紹琛所將多河中兵河中將焦武
等號哭於軍門曰西平王何罪闔門屠膾我輩歸則
同誅決不復東矣紹琛自劍州擁兵西還自稱西川
節度使移檄成都招諭蜀人衆至五萬繼岌聞之以

任園為副招討使追討之

集覽

琦角注見漢昭烈帝章武二年

質實

武連疑是地名未詳處所

巴蜀二州名注見楚義帝元年郭公謂郭崇韜朱公謂朱友謙大梁郡名注見周顯王二十九年西平王

朱友諒晉封西平王劍州注見玄宗天寶十五載普安

發明

康延孝為梁將逃奔于唐不書其叛者梁為篡弑之國故延孝得以未減其罪耳至於委

身事唐改賜姓名受其寵爵萬一事變之來回當守死無貳庶幾少雪前耻今乃隨事擇利輕於向背則是反覆不義之人矣直書曰反正其罪也

唐李紹榮攻鄴都不克

李紹榮至鄴都攻其南門遣人以敕招諭之趙在禮拜於城上曰將士思家擅歸相公誠善為數奏得免

於死敢不自新史彥瓊戰手大罵曰群死賊城破萬
段皇甫暉謂衆曰觀史武德之言上不赦我矣因聚
謀掠敕書手壞之守陴拒戰紹榮攻之不利以狀
聞唐主怒曰克城之日勿遺噍類大發諸軍討之

集

覽

守陴注見梁武帝天監三年登

質實

史武德史彥瓊表字鄴鄴

郡名注見漢成帝
綏和二年魏郡

唐從馬直軍士作亂伏誅

從馬直指揮使郭從謙本優人也優名郭門高以德
勝之役挑戰有功遂有寵積功至指揮使郭崇韜方
用事從謙以叔父事之又為睦王存乂假子及二人
得罪從謙數以私財饗諸校對之流涕言崇韜之寬
至是軍士王溫等五人作亂擒斬之唐主戲謂從謙
曰汝既負我附崇韜存乂又教王溫反欲何為也從

謙益懼退陰謂諸校曰主上以王溫之故俟鄴都平
定盡坑若曹家之所有宜盡市酒肉勿為久計也由
是親軍皆不自安

集覽

德勝之後事在梁
主瑱貞明五年

唐遣李嗣源將親軍討鄴都

李紹榮再攻鄴都賊知不赦堅守無降意唐主患之
日發中使促魏王繼岌東還繼岌以李紹琛叛留利
州未得發紹榮久無功會邢州兵趙大等亦為亂據
州未下滄州軍亂小校王景戡自為留後河朔州縣
告亂者相繼唐主欲自征鄴都大臣皆言京師根本
車駕不可輕動唐主曰諸將無可使者皆曰李嗣源
最為勲舊唐主心忌嗣源曰吾惜嗣源欲留宿衛皆
曰他人無可者張全義李紹宏亦屢言之乃許之

質實

中使注見玄宗開元十五年邢州注見楚義帝
元年襄國利州注見漢獻帝建安十六年葭萌

滄州注見晉穆帝永和六年河朔
二州名注見玄宗天寶十五載

唐以王延翰為威武節度使質實

威武節度注見漢武帝建元三年閏中

○唐討鄴兵劫李嗣源入鄴都

李嗣源至鄴都城西南下令詰旦攻城是夜從馬直
軍士張破敗作亂帥衆大譟焚營嗣源帥親軍拒戰
不能敵嗣源叱而問之對曰將士從主上十年百戰
以得天下今貝州戍卒思歸主上不赦從馬數卒諠
競遽欲盡誅其衆我輩初無叛心但畏死耳今欲與
城中合勢請主上帝河南令公帝河北嗣源涕泣諭
之不從遂拔白刃擁嗣源及李紹真等入城城中不
受外兵逆擊之皆潰趙在禮帥諸校迎拜嗣源泣謝
曰將士革負令公敢不惟命是聽嗣源說說在禮曰
凡舉大事須藉兵力今外兵流散無所歸我為公出

收之在禮乃聽嗣源紹真俱出城宿魏縣散兵稍有至者

集覽

詭說說輸芮反用詭為之計而說誘

之質實

魏縣注見漢成帝綏和二年

發明

歐陽公修作五代史於莊宗本紀書李嗣源反自以為得春秋之法今綱目於嗣源之事

待之甚恕是時倡亂者張破敗既不書其主名止書討鄴兵劫嗣源入鄴言兵則罪均於衆而嗣源之責為輕言劫則非嗣源本意而出於衆兵之所劫持又不以軍亂為文而繼書嗣源奔相州于下則見其棄衆獨奔之意皆所以推原本心以恕待之耳嗣源亦何以得此於綱目哉夫以莊宗失道寵信伶官殺戮無辜軍民恐叛嗣源省人目不知書非有篡國之心爭帝之意偶為亂兵所劫既趣魏縣衆不滿百又欲束身詣闕復為李紹榮隔絕迫於逃死進退維谷既而衆軍歸之如蛾赴火然

後入洛入汴之行始不可遏以理言之固可責以不能死節之義若槩以反逆誅之律亦有詞於我矣綱目誅亂臣討賊子凜乎不恕而乃書法如此是豈私于嗣源者哉春秋誅心之法推見至隱亦以嗣源本心甚明初無他意耳趙穿弑君而歸獄趙盾者誅其心也嗣源得國而綱目恕之者原其情也一輕一重之間而綱目之情見矣春秋之法明矣尚何疑於歐陽氏之說哉

唐任圜破李紹琛擒之孟知祥討定餘寇

董璋將兵二萬會任圜討李紹琛至漢州紹琛逆戰張礪請伏精兵於後而以羸兵誘之圜從之紹琛大敗閉城不出漢州無城塹樹木為柵圜攻焚之紹琛戰敗奔綿竹追擒之孟知祥自至漢州犒軍與任圜董璋置酒高會引李紹琛檻車至座中知祥自酌大卮飲之謂曰公何患不富貴而求入此邪紹琛曰郭

侍中佐命功第一兵不血刃取兩川一旦無罪族誅如紹琛輩安保首領以此不敢歸朝耳魏王繼茂倍道而東孟知祥獲李肇侯弘實以為牙內都指揮使蜀中群盜猶未息知祥擇廉吏使治州縣蠲除橫賦安集流散下寬大之令與民更始遣**質實**漢成帝鴻趙廷隱張業將兵分討群盜悉誅之

嘉三年廣漢綿竹縣名注見漢光武建武十二年

唐李嗣源奔相州

李嗣源之為亂兵所逼也李紹榮有衆萬人營於城南嗣源遣牙將七人相繼召之欲與共攻亂者紹榮疑不應及嗣源入鄴遂引兵去嗣源在魏縣衆不滿百又無兵伏李紹真所將鎮兵五千聞嗣源得出相帥歸之由是兵稍振嗣源欲歸藩待罪中門使安重誨曰公為元帥不幸為凶人所劫李紹榮不戰而退

歸朝必以公藉口公若歸藩則為據地邀君適足以實讒慝之口耳不若星行詣闕面見天子庶可自明嗣源曰善南趣相州遇馬坊使質實鄴郡名注見漢元帝建昭二年康福得馬數千匹始能成軍

魏郡

書法

非切嗣源者張破敗不書書討鄴兵何衆辭也引兵大梁也猶書日向曰入綱目於嗣源多恕辭亦亮其無利之之心而已耳

唐豫借河南夏秋稅

唐主以軍食不足敕河南尹豫借夏秋稅民不聊生租庸使以倉儲不足頗腹刻軍糧軍士流言益甚宰相懼帥百官上表請出內庫之財以給諸軍唐主欲從之劉后曰吾夫婦君臨萬國雖藉武功亦由天命

命既在天人如我何宰相又於便殿論之后屬耳於
屏風後須臾出粧具及三銀盆皇幼子三人於外曰
四方貢獻隨以給賜所餘止此
集覽 臍刻臍音宣褰
耳請鬻以贍軍宰相惶懼而退
言謂其言如
流謗毀無實

書法

豫借行而民不聊其生
矣綱目書豫借一而已

發明

莊宗亂亡之事非一而貪吝之禍尤深既以
股削失軍心又以掊歛失民心夫平時正稅

尚欲捐以予民恐復先期而取強以豫借名之乎
况是時人心已離雖盡出內帑痛自改厲尚恐不
及矧又以貪吝趣之哉直筆書之亂益甚矣○嗚
呼橫歛厚征治天下之大蠹也所以失人心者在
是所以促國脉者在是然猶未至於豫借之甚者
也方其行橫歛厚征之法也天下之民雖怨咨愁

覺然猶歸咎於上之人用非其人取非其道幸其
一旦更之尚可以為生也惟豫借之命一行示天
下以國儲之虛國用之竭國計之窮天下之人譁
然謂天下不復可為而生其泮渙離散之心者未
必不自此也掌國
計者惟其謹之哉

唐李嗣源引兵向大梁

李紹榮退保衛州奏李嗣源已叛與賊合嗣源遣使
上章自理一日數輩唐主遣嗣源長子從審諭嗣源
至衛州紹榮欲殺之從審乃還唐主憐之賜名繼璟
待之如子是後嗣源所奏皆為紹榮所遏不得通嗣
源由是疑懼石敬瑭曰夫事成於果決而敗於猶豫
安有上將與叛卒入賊城而他日得保無恙乎大梁
天下之要會也願假三百騎先往取之公引大軍亟
進如此始可自全康義誠曰主上無道軍民怨望公

從衆則生守節必死嗣源乃令安重誨移檄會兵時
李紹虔李紹欽李紹英屯瓦橋安審通屯奉化嗣源
皆遣使召之嗣源家在真定虞候將王建立先殺其
監軍由是獲全李從珂將所部兵趣鎮州與建立合
倍道從嗣源源分三百騎使石敬瑭將之前驅李
從珂為殿軍勢大盛從子從璋過邢州邢人奉為留
後唐主乃詔白從暉將騎兵扼河陽橋出金帛給賜
軍士詎曰吾妻子已殍死得此何為李紹榮至洛陽
曰鄴都亂兵欲濟河襲鄆汴顧
陛下幸關東招撫唐主從之
貨實奉化疑是地名
注見秦孝文王元年為殿注見梁武
帝天監五年殿後河陽橋未詳處所

發明

按綱目於李嗣源多恕辭亮其無利之心
也歐陽氏五代史書其反何明君臣之大義

也方張破敗劫嗣源入城得間出宿魏縣奔相州
時而書其反是誣之也若夫聽石敬瑭之計急趨

汴州命安重誨移檄會兵欲何為哉及嗣源在汴
唐主至萬勝鎮君臣相望僅數十里間耳苟無反
心胡不遣腹心之使陳忠赤之詞明其為元行欽
所隔絕安知唐主不亮其心也哉况大梁天子之
城乃公然占而據之車駕將至不行避避及其返
也又以兵踵之而西其意果何在哉謂其無利之
之心愚不敢以為然也五代史以反書之夫豈過
哉然通以一反辭該之則似乎無所分辨故五代
史於前書親軍劫其入城至是入大梁始以反書
焉或曰嗣源非有篡國之心爭帝之意偶為亂兵
所劫姦臣所逼迫於逃死進退惟谷蓋有不得已
焉耳嗚呼春秋無將將則必誅茲何等事而可以
不得已而不已哉然則為嗣源計將奈何方其出
宿魏縣之時聽安重誨之言束身單騎由間道星
行赴闕面陳其被劫之狀伏地俟罪元行欽雖欲
間之胡可得邪又不然得李紹真五千之兵即整

肅部伍申明號命移檄遠近以明本心返旆直抵
鄴城期縛趙在禮以獻闕下雖所奏之辭沮而不
達而所行之事足以自明百元行欽不能
間之矣計不出此乃陷於篡逆之罪惜哉

唐殺故蜀主王衍夷其族

景進等言於唐主曰西南未安王衍族黨不少聞車
駕東征恐其為變不若除之唐主乃遣中使齎敕往
誅之敕曰王衍一行並從殺戮已印畫張居翰覆視
就殿柱楷去衍字改為家字由是獲免者千餘人衍
母徐氏且死呼曰吾兒以一國迎降不
免族誅信義俱棄吾知汝行亦受禍矣
胡卦反於敕書已
使印已簽署之後

書法

書殺何已降也齊滅元氏之族書齊主周滅
高氏之族書周主隋滅宇文氏之族書隋主

此其不書唐主何罪有分也綱目之權衡審矣然則姚泓降斬不書故秦王此則曷為以故蜀主書唐於蜀敵國也

發明

王衍已降矣不書蜀降人而書故蜀主者不
予唐人殺之也然則衍無罪乎衍荒淫失國
則有之矣唐既受其降又安得率然無故殺之哉
彼自其先世據有土宇唐既奪而有之又嘗賜以
裂土之詔今乃反夷其族則夫背
信食言曲不在彼是以書法如此

唐主如關東李嗣源入大梁唐主乃還

唐主發洛陽次汜水或勸繼瑒亡去不從唐主亦屢
遣之繼瑒固辭請死唐主聞嗣源在黎陽彊遣繼瑒
召之道遇李紹榮見殺嗣源至滑州符習安審通引
兵來會知汴州孔循遣使迎唐主亦遣使輸款於嗣

源曰先至者得之石敬瑭以勁兵入封丘門遂據其城使人趣嗣源嗣源入大梁是日唐主至榮澤東命

龍驤指揮使姚彥溫將三千騎為前軍彥溫即以其

衆叛歸嗣源嗣源奪其兵唐主至萬勝鎮聞嗣源已

據大梁諸軍離叛神色沮喪登高歎曰吾不濟矣即

命旋師夜復至汜水扈從兵二萬五千已失萬餘人

還過壘子谷道遇衛士輒以善言撫之曰適報魏王

又進西川金銀五十萬到京當給爾曹對曰陛下賜

已晚矣人亦不感聖恩唐主涕泣而已又索袍帶賜

從官內庫使張容哥稱頒給已盡衛士叱之曰致吾

君失社稷皆此閹豎輩也抽刀逐之容哥謂同類曰

皇后吝財致此今乃歸咎於吾輩事若不測吾輩萬

段吾不忍待也因赴河死唐主至石橋西置酒悲涕

晚入洛城嗣源命石敬瑭將前軍趣汜水収撫散兵

嗣源繼之李紹虔李紹英引兵來會宰相樞密奏西

軍將至車駕宜且控汜水收撫散兵以俟之唐主從

之集覽

次汜水春秋釋例凡師出一宿為舍再宿為信過信為次也汜水注見漢王邦四年閏豎

注見晉惠帝元康元年且控質實封丘門注見晉主控據也謂姑且依據汜水也重貴開運三年一

統志云滎澤古澤名春秋衛侯及翟人戰于滎澤即此地秦三川郡嘗移治於此漢為滎陽縣地晉屬滎

陽郡隋初置廣武縣仁壽初改為滎澤縣屬鄭州唐因之宋初省入管城元祐初復為縣元屬汴梁路

國朝初因之改屬開封府萬勝鎮未詳處所盟子谷未詳處所石橋未詳處所

發明

天下之患莫大於人心之離離則不可復合書曰一人三失怨豈在明不見是圖方是時

也軍心民心魚潰鳥散如水之泮渙然而解不可收拾雖有良平之智賁育之勇韓白之才亦末如之何矣故綱目於此書唐主如關東則見其兵衆盡離之意書李嗣源入大梁則見其國都已失之

意書唐主乃還則見其趑趄猶豫徘徊不得已之意所以著人心之失已非一日無可言者故其書法如此夫尊居人上寵綏四方雨露之所沾濡膏澤之所浸潤必使膠固而不可解愛之如父母仰之如日月烏有遣兵而兵叛遣將而將叛遣左右而左右叛遣大臣而大臣叛遂至彷徨四顧惻然無歸欲為獨夫而不可得者哉後王鑒此其亦思群心之難保必固結於平日毋至一離而不可復合如同光之主乎

夏四月唐伶人郭從謙弒其主存勗李嗣源入洛陽

唐主復如汜水四月朔嚴辦將發從馬直指揮使郭從謙帥所部兵攻興教門唐主方食聞變帥衛兵擊之逐亂兵出門時朱守殷將騎兵在外唐主急召之守殷不至引兵憇茂林下亂兵焚興教門緣城而入

近臣宿將皆釋甲潛遁獨散員都指揮使李彥卿軍校何福進王全斌等十餘人力戰俄而唐主為流矢所中鷹坊人善友扶下至絳霄殿廡下抽矢渴邁劉后不自省視遣宦者進酪須臾遂殂彥卿等慟哭而去左右皆散善友飲樂器覆屍而焚之劉后囊金寶繫馬鞍與申王存渥及李紹榮焚嘉慶殿出走朱守殷入宮選官人三十餘人內於其家於是諸軍大掠是日李嗣源至罌子谷聞之慟哭謂諸將曰主上素得士心止為群小蔽惑致此今吾將安歸乎乃入洛陽止于私第禁焚掠拾莊宗骨於灰燼之餘而殯之謂朱守殷曰公善巡徼以待魏王淑妃德妃在宮供給尤宜豐備吾俟山陵畢社稷有奉則歸藩為國家扞禦北方耳是日豆盧革帥百官上牋勸進嗣源曰吾奉詔討賊不幸部曲叛散欲入朝自訴又為紹榮所隔披猖至此諸軍見推殊非相悉願勿言也紹榮欲奔河中為人所執折足送洛陽魏王繼岌至興平

聞亂復引兵西謀保鳳翔始誅李紹琛胡氏曰莊宗
初立決勝夾寨解潞州之圍歸而治國訓兵事各有
理使朱溫未死固必為所擒矣既違張承業忠謀亟
稱尊號則舉措之失已稍形見逮滅梁之後遂無一
善可稱與向者猶二人然是何也才器有限也若曰
天數則裂膚汗血沐雨櫛風凡十五年而後得好田
好女寵伶人信宦官不三年而滅亡其心昔明而今
暗先戒而後肆豈亦天邪故莊宗之命哲命吉凶命
歷年皆所自貽不
集覽善友扶下善上聲姓也名友
可歸之天數也時唐主在興教門樓上友扶
之而下巡徽音呼史記索隱曰徽是郊外路謂巡
徼而伺察境界勸進勸勉嗣源進尊號披猖注見齊
高帝建元元年命哲命吉凶命歷年書召誥篇文孔
氏傳曰今天制此三命惟人所修修敬德則有智則
常吉則歷年為不敬德則愚
正誤
巡徼今按徼循也
凶不長雖說之其實在人

掌徽循京師顏師質實見梁武帝太清二年義陽嘉

慶殿未詳處所部曲注見陳文帝天嘉元年鳳翔府

名注見周顯王八年岐興平縣名注見楚義帝元年

書法從謙指揮使也不書書伶人所以著寵任伶

自矜功亦一代之英矣然自臧梁以後綱目所書

殆無一善可述者非徇伶官則務貨色事田遊而

已卒之人心大去不保其身蓋克敵之才雖勝而君人之道則未之有聞也

發明凡傷生之事非一皆足以亡其國故衛以好鶴亡梁以好

土功亡吳以好戰亡凡偏有所好未有不亡其國

者况於驕侈淫欲馳騁弋獵宦官女寵無一之不

備者哉莊宗自滅梁以來凡書于冊者畧無一善可紀如用亡國之臣悅姦諛之輩任宦者貸民錢毀城池采民女造樓觀殺勲臣恣遊獵靡一弗具至於酷好優伶尤其素習甚至優名李天下躬自為之甘蹈下流而不耻於是寵信其徒撓亂國政淪於滅亡不自知悟故綱目於其弒也不書指揮使郭從謙而必揭伶人郭從謙書之所以著禍敗之因實在於此欲使後人知優伶之禍若是其慘毋徒以為僅資戲笑而遂忽之其為後鑒豈不明哉

唐太原軍亂

初莊宗命呂鄭二內養在晉陽張憲以下承應不暇莊宗既殂推官張昭遠勸張憲奉表勸進憲曰吾自布衣至服金紫皆出先帝之恩豈可偷生而不自愧乎昭遠泣曰此古人所行公能行之忠義不朽矣有

李存沼者莊宗之近屬與二內養謀殺憲及巡檢李彥超彥超欲先圖之憲曰僕受先帝厚恩不忍為此拘義而不免於禍乃天也軍士共殺二內養及存沼憲奔忻州會嗣源移書至彥超號令士卒城中始安彥超彥卿

集覽

呂鄭二內養呂鄭皆姓也史不記其

倉庫養質實忻州注見晉孝武餘亮反

太元九年新興

唐李嗣源監國

百官三牋請嗣源監國嗣源乃許之入居興聖宮百官班見下令稱教宣徽使選後宮美少者數百獻之監國曰奚用此為對曰宮中職掌不可闕也監國曰宮中職掌宜諳故事此輩安知乃悉用老舊之人補之其少年者皆出之蜀中所送宮人準此

唐以安重誨為樞密使張延朗為副使

延朗本梁祖庸吏性纖巧
善事權要故重誨引之

集覽

纖巧史昭釋文曰廉
纖精巧也漢書音義

曰纖儉嗇也
巧謂機巧也

唐監國嗣源殺劉后及諸王

監國令所在訪求諸王通王存確雅王存紀匿民間
安重誨與李紹真謀曰今殿下既監國典喪諸王宜
早為之所以一人心密遣人殺之後月餘監國聞之
切責重誨傷惜久之劉后奔晉陽在道與存渥私通
存渥為其下所殺劉后為尼於晉陽監國使人就殺
之莊宗幼子繼嵩等皆不知所終惟邕王存美以病
得免質實通州名注見肅宗上元二年雅州名注見僖
宗中和二年晉陽縣名注見周威烈王二十

三年邕州名注見
憲宗元和十五年

書法

劉后不書弒何罪人也莊宗之不終后之貪
吝實為之殺諸王者重誨也曷為斥嗣源重

誨專殺而無討則嗣源不得辭其咎矣綱目書嗣
源得國多恕辭於是書監國殺者三諸王李紹榮

孔謙亦責備
賢者之意也

發明

劉后致莊宗滅亡固無可言諸王何辜亦併
及之哉然后為主母嗣源乃其故臣法當書

弒而書殺者劉氏有亡國之罪不得為國母也諸
王之死監國初不之知而歸罪監國者既聞而傷
之乃不能正專殺者之罪故也合
而書之自有深意觀者不可不察

高季興以孫光憲掌書記

徐溫高季興聞莊宗過弒益重嚴可求梁震梁震薦
孫光憲掌書記季興欲攻楚光憲諫曰荆南亂離之
後賴公休息士民始有生意若又與楚國**集覽**交惡
交惡他國乘吾之弊良可憂也季興乃止左傳
周鄭交惡注惡如
字兩相疾惡也

唐監國嗣源殺李紹榮

紹榮被執監國責之曰吾何負於爾而殺吾兒紹榮
瞋目直視曰先帝何負於爾遂斬之復其姓名曰元
欽行

發明

紹榮有罪既削其爵宜正其誅乃以殺書何
哉嗣源自有乘亂取國之耻故不得為天討

也下書殺

孔謙亦然

唐張居翰罷以孔循為樞密使○唐監國嗣源殺孔謙
廢租庸使及諸道監軍

監國下教數租庸使孔謙姦佞侵刻窮困軍民之罪
而斬之凡謙所立苛歛之法皆罷之因廢租庸使依
舊為三司委宰相一人專判又罷諸道監軍使以莊
宗由宦官亡國命諸道盡殺之

集覽

三司
鹽鐵

戶部度
支是也

書法

孔謙培克致亂罪人也不書誅何君弒賊不
討而察察於其細以為若正天討則罪宜有

所先矣故止書殺然則謙無貶歟削其爵足以示
貶矣於是諸道監軍皆命本道殺之書廢不書殺
畧之也

唐魏王繼岌至長安自殺

魏王繼岌退至武功李從襲曰退不如進請亟東行以救內難繼岌從之還至渭水留守張錢已斷浮梁乃循水浮渡至渭南腹心呂知柔等皆已竄匿從襲謂繼岌曰時事已去王宜自圖繼岌徘徊流涕乃自伏於牀命李環縊殺之任圜代將而東華州都監李冲殺從襲胡氏曰任圜參預軍機而主帥一旦至此從容其間莫能掄止而竊取其柄得為忠乎李愚職與圜同而寂無所施亦不得為無罪矣且武皇諸子至是或誅或病莊宗五子繼岌縊死餘不知所終何也德養人者也力勝人智欺人者也我以智力加人有時而窮則人亦得以加諸我矣故用智未有不困者也我養人其養既久則人亦不忍離我矣故修德未有不安者也三代而上純德之世也三代以下皆力也假德以文之視其智力之裕局則斷其成就之

廣狹觀其假德之深淺則決其所享之延邇後唐之事亦足以觀矣歐陽氏以為向使張錢不斷橋使繼炭得東明宗未必能自立愚以為不然繼炭制於從襲莫能可否使其有立豈以皇后教殺郭崇韜既聞大變宜整比六師倍道赴難豈張錢斷橋所集覽張能過乎以彼之才政使東行豈嗣源之敵也

姓名也錢將先反整比

質實

武功縣名注見漢後主比音毘至反校次之也

建興十二年渭水注見

漢高帝五年渭南縣名注見漢獻帝建安十六年

注見太宗貞觀二十三年

唐主嗣源立

有司議即位禮李紹真孔循以為唐運已盡宜自建國號監國問左右何謂國號對曰先帝賜姓於唐為唐復讎故稱唐今梁朝之人不欲殿下稱唐耳監國曰吾年十三事獻祖獻祖以吾宗屬視吾猶子又事

武皇先帝垂五十年經綸攻戰未嘗不預武皇之基業則吾之基業也先帝之天下則吾之天下也安有同家而異國乎李琪曰若改國號則先帝遂為路人梓宮安所託乎不惟殿下不忘三世舊君吾曹為人臣者能自安乎前代以旁支入繼多矣宜用嗣子柩前即位之禮衆從之監國服斬衰於柩前即位百官縞素既而御衆冕受冊百官告服稱賀胡氏曰李琪之言似也然國亡君弑子不得立而他人是保人臣心不自安尚有

集覽

縞素注見秦實實獻祖謂李國莊襄王三年

克用梓宮注見漢安帝延光四年

衣冕

注見漢平帝元始五年

書法

書郭從謙弑其主然後書嗣源立皆順辭也綱目

於嗣源多恕辭則亦

亮其無利之心耳

發明

綱目於非正統之君其子嗣位書立嗣源立

五代主中之彼善於此故恕之歟五代史於此不

書其立而以稱帝書以明其不得以嗣莊宗之位

也况前既書其反乎何則五常之中君臣獨謂之

義臣之事君獨謂之忠義者斷制之宜忠者心無

不盡之謂也嗣源本蕃人李克用養以為子賜以

姓名附之屬籍莊宗嗣位委以重任付以兵權君

臣之分素定一旦為亂兵所脇不得已而入亂城

幸而以計得出單騎歸朝明其本心可也却乃回

翔不進及夫車駕東出又不即赴行在趨拜道左

公然擁兵亟趨汴州以爭先奪利車駕之還又不

危送且以兵踵之所謂斷制之義盡心之忠安在

哉假使嗣源之心實出避禍一聞莊宗被弑當即

日揚旗西指以討罪人傳檄四方遣使西迎魏王

奉請劉后臨朝以俟嗣君之至顧乃遽然居太子

監國之位布置私人以掌樞機殺害國母以及親王魏王聞之安得而不自殺雖曰自殺其與嗣源殺之也無異此五代史所以書其反又書其稱帝以明明宗實非沙陀之番人而於莊宗之義則已絕矣或曰五代史亦有所據歟曰觀明宗欲殺元行欽責之曰我兒何負于爾行欽瞋目直視之曰先帝何負于爾歐陽子謂行欽誠節有足嘉者則明宗逆節有足惡者不言可知矣不特此也綱目引胡氏論李琪諫改國號臣心不安之言亦謂國亡君弑子不得立而他人是保是亦不滿於明宗之立也史雖委曲為之開說若明宗有若不得已焉者嗚呼史豈皆實哉按莊宗實錄明宗時宰相趙鳳修明宗實錄潞王時宰相姚顗修至宋薛居正等採以為正史司馬公又據正史以為通鑑其所書者果得其實否乎雖然其明白昭著者亦自有不容掩焉者歐陽氏作史時去五代未遠其必

有所據
矣夫

唐殺其太原尹張憲

有司劾憲委城之罪也胡氏曰張憲不附伶官以致
疎外進不預朝廷之謀退不預鄴都之亂及嗣源入
洛又不雷同勸進懷忠狗義蓋賢者也明宗即位考
慎相臣無以踰憲者矣乃狗有司迎合之奏而殺之
無乃重誨
所欲乎

唐大赦考證

下當書
境內

唐主大赦量留後宮百人宦官三十人教坊百人鷹
坊二十人御厨五十人中外母得獻鷹犬奇玩諸司
使務有名無實者皆廢之分遣諸軍就食近畿以省
饋運除夏秋稅省耗諸侯四節貢奉母得歛百姓剝

史以下不得貢奉胡氏曰此數條者聖王常事也而
英雄明達如漢武帝唐太宗猶有不能焉明宗乃沙
陀人從容行之豈不為賢哉且非矯勉於初政而
急急於末路者其賢益可尚矣是故表而出之

集

覽

近畿注見昭宗天祐元年畿甸四節
貢奉四節謂元旦冬至端午降誕

唐以鄭珏任圜同平章事

國憂公如家簡拔賢俊杜絕僥倖期年之間軍民皆
足朝綱粗立圜每以天下為己任由是安重誨忌之

質實

僥倖注見宋孝
武帝大明二年

唐李紹真等復姓名

李紹真李紹瓊李紹英李紹虔李紹奇李紹能各復
舊姓名為霍彥威裴從簡房知溫王晏球夏魯奇米

君立晏球本王氏子畜
於杜氏故請復姓王

書法

初賜姓名不書畧之也復姓名則何以書予
其復也唐末不書賜姓名書削惟李茂貞五

代不書賜姓名
書復唯紹真等

發明

自克用好養假子而後賜姓名者接踵其
混亂族類多矣正而復之亦其宜也故書

唐初令百官轉對

初令百官正衙常朝外五日
一赴內殿起居轉對奏事

書法

五日一轉對令
典也書初美之

發明

百官轉對亦清朝令典而實始於此然則唐
主豈可以目不知書忽之哉特書曰初蓋予

也之

唐以安金全為振武節度使質實

振武節度注見憲宗元和八年

追賞晉陽之功也

唐以趙在禮為義成節度使質實

義成節度注見隋恭帝皇泰二年滑州

在禮以軍情未聽不赴

唐以馮道趙鳳為端明殿學士

唐主目不知書四方奏事皆令安重誨讀之重誨亦不能盡通乃奏請選文學之臣與之共事以備應對乃置端明殿學士以道鳳為之胡氏曰天子宰相義禮所出天下取正焉者也氣數清薄乃至目不知書

者為之夫安能考前言學古訓以治天下也然明宗
所行有太宗所不及則其賢之美也使輔以學則為
聖賢必矣而道鳳腐儒不能以開導裨益
使天成之政加美於前也不亦可惜矣哉
腐者爛敗貌言儒者但能
守陳腐之見不達時宜

集覽

腐

唐聽郭崇韜歸葬復朱友謙官爵

書法

書聽歸葬何予存厚也蓋綱目予存厚故詔
許鄧鵬還葬書漢安帝建光元年聽郭崇韜

歸葬書
是年

○六月唐汴州軍亂指揮使李彥饒討平之

詔發汴州軍戍瓦橋已出城指揮使張諫復還作亂
殺知州高遜逼指揮使李彥饒為帥彥饒禁止焚掠

伏甲執諫等斬之賊黨大譟彥饒擊之盡殪即日牒推官韋儼權知軍州事彥饒彥超之弟也質實

汴州注見周顯王
二十九年大梁

秋七月唐安重誨殺殿直馬延

安重誨恃恩驕橫殿直馬延誤衝前導斬之於馬前御史大夫李琪以聞重誨白帝下詔稱延陵突重臣
戒諭
中外

發明

安重誨之不終蓋已見之於此矣
故書之以正其專殺無君之罪

契丹攻渤海拔其餘城

契丹主按巴堅攻渤海拔其夫餘城更命曰東丹國
命其長子托雲鎮之號人皇王次子德光守西樓號

元帥

集覽

渤海注見隋文帝開皇十八年

質實契

太子

鞞夫餘注見新莽始建國元年

北狄種名注見晉

安帝義熙二年

唐遣供奉官姚坤如契丹

唐遣姚坤告哀於契丹契丹主按巴堅聞莊宗遇害
慟哭曰我朝定爾也朝定猶華言朋友也謂坤曰今
天子聞洛陽有急何不救對曰地遠不能及曰何故
自立坤為言其由契丹主曰漢兒喜飾說母多談又
曰聞吾兒專好聲色遊畋不恤軍民宜其及此我自
聞之舉家不飲酒散遣伶人解縱鷹犬若亦效吾兒
所為行自亡矣又曰我於今天子無怨足以修好若
與我大河之北吾不復南侵矣坤曰此非使臣之所
得專也契丹主怒囚之旬餘復召之曰河北恐難得
得鎮定幽州亦可也給紙筆趣令為狀坤不可欲殺

之韓延徽諫

質實

河北道名注見漢成
帝綏和二年魏郡

唐豆盧革說罷

革說奏事唐主前禮貌不盡恭百官俸錢皆折估而
革父子獨受實錢說以孫為子奏官受選人賂除近
官中旨以蕭希甫為諫議大夫革說覆奏希甫恨之
上疏言革說不忠前朝並誣革他罪制罷革說擢希
甫為散
騎常侍

契丹按巴堅死

按巴堅卒於夫餘城舒魯后召諸酋長妻謂曰我今
寡居汝不可不效我又集其夫立問曰汝思先帝乎
對曰受先帝恩豈得不思曰
集覽
立問曰立之於
果思之宜徃見之遂殺之
其前而問云
正

誤

立問今按通鑑本文及今本綱目皆作泣問為是

發明

外蕃君長卒不書卒按巴堅前已稱帝改元至此不書卒者從乎書法之例本不得比於

內地分藩之列自是而後例皆倣乎此

八月朔日食質實

口食注見新莽天鳳元年

唐孟知祥增置營兵

知祥陰有據蜀之志增置諸營兵七萬餘人

唐平盧軍亂討平之

平盧軍校王公儼作亂討斬之其黨支使韓叔嗣預焉其子熙載將奔吳密告其友李穀曰吳若用吾為

相當長驅以定中原穀笑曰中原
集覽其黨支使使
若用吾為相取吳如囊中物耳
去聲支使即

支度使也乃王
正誤支使今按此謂平盧節度府之
公儼之黨輩
支使非三司使之支使也度入

聲唐採訪節度觀察等使
質實平盧軍注見漢桓帝
幕屬有判官有支使等
永康元年青州韓叔

嗣維州北海人中原注
見玄宗天寶十五載

九月契丹德光立

契丹舒嚕后愛中子德光欲立之至西樓命與托雲
俱乘馬立帳前謂諸酋長曰二子吾皆愛之莫知所
立汝曹擇可立者執其轡酋長知其意爭執德光轡
后曰衆之所欲吾安敢違遂立之為天皇王托雲愠
欲奔唐后遣歸東丹德光尊后為太后國事皆決焉
太后復納其姪為后德光性孝謹母病不食亦不食

以韓延徽為政事令聽姚坤歸唐葬按巴堅於木葉山太后左右有桀黠者后輒謂曰為我達語於先帝至墓所則殺之前後所殺以百數最後平州人趙思溫當徃不肯行后曰汝事先帝嘗親近何為不行對曰親近莫如后后行臣則繼之后曰吾非不欲從先帝於地下也顧嗣子幼弱國家無主不得徃耳乃斷一腕令置墓中

集覽

托雲按巴堅之長子名東丹即思溫亦得免夫餘城也桀黠黠下八反按韻

會桀字下引說文桀磔也徐氏曰周禮謂磔為鬲辜古人謂桀黠者謂凶暴若磔也質實苗長注見

漢帝立更始二年一統志云木葉山在遼東廣寧中屯衛東三十里上建契丹始祖廟奇首可汗在南廟可敦在北廟繪塑二像並八子像相傳有神人乘白馬自馬孟山浮土河而東有天水駕青牛車由平地松林泛潢河而下至木葉山二水合流相遇為配偶生八子其後族屬漸盛分八部每行軍及時祭必青

牛白馬云平州注見
秦王政三年石北平

冬十月唐初賜百官春冬衣○王延翰自稱閩王質實

閩國名注見漢武
帝建元三年閩中

延翰驕淫殘暴自稱大閩國
王宮殿百官皆故天子之制

契丹盧龍節度使盧文進奔唐

文進為契丹守平州唐主遣人說之以易代之後無
復嫌怨文進所部皆華人思歸乃帥其衆十萬歸唐

質實
盧龍節度注見漢武
帝元朔二年肥如

書法

文進嘗書亡奔契丹為守平州矣於是而歸
于唐則其不書歸何誅心也文進既受契丹

未有歸意唐雖說之非迫於所部則亦未必歸矣故上書稱官下書奔深賤之

發明

文進何以不書叛彼其歸唐理之正也況文進本中國之人又非塞外部落之比故其書

法如
此夫

唐以趙季良為三川制置轉運使李嚴為西川都監

初郭崇韜率蜀中富民輸犒賞錢五百萬緡晝夜督責有自殺者給軍之餘猶二百萬緡至是任圜判三司知成都富饒遣季良為三川都制置轉運使蜀人欲皆不與知祥曰府庫他人所聚輸之可也州縣租稅以贍鎮兵決不可得季良但發庫物不敢復言制置轉運職事矣安重誨以知祥及東川節度使董璋皆據險擁兵又知祥乃莊宗近姻陰欲圖之李嚴自請為西川監軍嚴母謂曰汝前啟滅蜀之謀今日再

往必以死

質實

三川郡名注見秦莊襄王元年西川

報蜀人矣川節度注見漢獻帝

唐罷告身綾軸錢

舊制吏部給告身先責其人輸朱膠綾軸錢喪亂以來貧者但受敕牒多不取告身侍郎劉岳言告身有褒貶訓戒之辭豈可使其人初不之覩後執政議以為朱膠綾軸厥費無多乃奏罷之是後試銜帖號所除浸多乃至卒伍胥吏皆得銀集覽告身注見陳宣青階及憲官歲賜告身以萬數帝太建九年

十二月閩王延稟弑其君延翰而立其弟延鈞

延翰茂棄兄弟出延鈞為泉州刺史延翰多取民女以充後庭延鈞上書極諫由是有隙審知養子延稟

為建州刺史延翰使之采擇延稟復書不遜亦有隙
合兵襲福州延稟先至梯城而入延翰驚匿延稟執
之暴其罪惡斬于門外延鈞質實泉州注見僖宗光
啟元年建州注見
至延稟納之推為威武留後
晉武帝泰始五年建安福州
注見漢武帝建元三年閩中

唐主以其子從榮為天雄節度使質實天雄節度注見
漢成帝綏和二
年

御批資治通鑑綱目卷五十五

謹案第四頁前二行箭筈嶺按此云在岐山者非也當從集覽作在秦州為是

第七頁前四行普寧縣名未詳沿革按唐地理志嶺南道容州普寧郡普寧縣此失考

第十二頁前七行在灤州東北四十里按唐地理志定州望都縣武德四年置此以契丹僞置之望都注此者誤

第十二頁後八行不攻德勝刊本勝訛州今改

第十六頁後二行河東推官盧程為之刊本推訛
判據本傳改

第十九頁前八行岌岌不安貌刊本不安作山高
據孟子趙注改

第十九頁後一行東平郡名刊本郡訛府據唐地
理志改

第二十一頁前七行少尹任圜刊本圜訛團據盧
程傳改

第三十頁後五行楚州名注見宋孝武大明三年
山陽按是時楚地不得至山陽此誤

第四十八頁前行注見漢成帝綏和二年魏郡
按唐方鎮表大中三年升秦州防禦守捉使為
秦成兩州經畧天雄軍使咸通五年升經畧天
雄軍使為天雄軍節度等使非魏博之天雄也
此誤

第六十二頁後七行湖南道名按潭衡等州在唐

屬江南道在宋屬荆湖南路則湖南非道名此
誤

第六十五頁後三行仁最部兵皇甫暉按類篇暉
人名南唐大將皇甫暉今五代史及南唐書俱
作暉

第六十七頁前一行武連疑是地名按唐地理志
劍州武連縣元和志縣東北至州八十五里此
失考

第六十七頁前三行朱友謙晉封西平王刊本訛
郭崇韜追謚西平王按此時崇韜初誅安所得
謚且西平亦非謚法今據朱友謙傳改

第六十七頁後三行史武德史彥瓊表字按伶官
傳彥瓊為武德使居鄴都此誤

第七十四頁後四行仁壽初改為滎澤縣刊本澤
訛陽據隋地理志改

第八十九頁前一行三川郡名按此謂山南西道

及劍南道之東川軍西川軍非秦之三川郡也
此誤

謹案第十一頁前三行舒嚕舊作迷律今改後倣


此 後八行托輝舊作禿餒今改後倣此 十

二頁前七行按巴堅舊作阿保機今改後倣此

八十五頁前八行托雲舊作突欲今改後倣

此 後四行朝定爾舊作朝定兒今改

欽定四庫全書



總校官庶吉士臣張能照

校對官檢討臣郭寅

謄錄監生臣陳熙